


陳迦陵文集

四





陳迦陵儼體文集卷四

宜興陳維崧其年譔

海鹽彭孫遹美門選

弟維岳緯雲恭閱

吉水李振裕醒齋選

宗石子萬恭閱

男履端

校

姪

校

啟

刻周鹿溪先生遺集啟

金沙鹿溪周先生一代楷模三吳宗匠西京黨銅盡說范
滂東國人倫羣推郭泰氣節則激揚李杜理學則出入程
朱士類屬以槩匪清流奉爲領袖猥以嫉劉輿之膩馴令
禡酷東朝憎庾亮之塵終使釁開北部衣冠運盡文武道

衰茲者故集沉淪傳文凋散華林勲舊誰知袁粲之子孫
建業時賢孰修卞壺之墳墓未封馬鬣徒著龍門遺書乏
所忠之求弱胤抱西華之痛某等或親懿有類范雲或門
徒畧如景毅歎高山之不作猶佇風標撫流水之莫彈尚
思音擦雖賣珠合浦竟媿王成而掛劍徐君敢後季札諸
先生誼淡稽呂交儗尹班伏冀其任棗梨均輸資斧按班
設局分族成編庶幾鮑宣封事不浮沉於外戚之年谷永
彈章豈泯沒於宦官之日謹啟

徵贖十三經十七史毛氏書板啟

毛氏板時在洞庭席姓質庫中茲約人
出三十金贖後印書人酬以全書兩部

字易結繩權輿蒼頡書加雕板肇始開皇母昭裔初爲鋟
鏤之言沈存中備載膠泥之說石碑鑄畫基自蔡邕監本
流傳原於馮道振古鑄今寔乎尚矣慨自經從壁後書暨
燬來鹿爭劉項灾逮魯魚虎鬪袁曹禍延蝌蚪牙籤玉軸
蕭梁遭侯景而還錦褫縹囊趙宋值宣和而後馬廐鈔書
之客購善本以何從兎園挾冊之夫望長編而不見綠文
匿曜兩儀亦遂以烟霾絳斗韜芒七政或因而霧塞則有
隱湖處士吳郡徵君生聖門言偃之鄉是漢世毛萇之後
沉酣六籍以鉛槧爲功勲穿穴三倉以文章爲苑囿鳩工
鑿棗旁溯叢殘設局鐫梨首先經史庋之簾閣屋以巾箱

雞林遠播家珍汲古之一編驪戶遙傳人奉虞山之片紙
然而物固不常理恒難料文園旣沒詎存篋裏之几將執
戟云亡寧保櫝中之訓纂鳥棲別屋秘書亦緣是以他之
燕過誰家奇字亦於焉而皆去愍彼墨莊辱於質庫繫君
季子實小毛公班宜僚綽有父風顏延年雅傳庭誥軫懷
舊業結念先疇七日倚牆情更悲於夢冒千金飛矢墮已
斷於魯連疇分鮑叔之金莫返蘭卿之璧僕也願呼將伯
計出乞隣敢效一言希爲三復且夫室無諸史詎號儒林
架鮮全經何名學者較來三豕旣非裨官譴謾之流量去
一鴟復殊列肆麻沙之本欲還故物端藉高賢先祈按部
以捐貲行且酬書而減直無論嗟聖賢之燼誼仰千秋卽
云權子母之錢羸摵十倍時乎勿失事也可爲嗟乎銅幘

幌於程卓之家寃踰醫舐熏陟俚以金銀之氣虐甚鬱攸
何哉羽化尚想飛騰便爾塵埋猶然光怪勿使魏安釐母
弟阻函谷以難歸須念漢董祀賢妻跋玉門而望贖爰申
罕譬庶博軒渠

徵刻吳園次宋元詩選啟

選名移
我情集

何地無愁有天長醉英雄未老藉選句以移情歲月多閒
仗鈔詩而送日維時祝融煽虐鶉火揚輝流金鑠石如逢
十日之年望雨瞻雲若在無龍之國爰約論文之侶同過
看奕之軒忽有微涼濯予煩暑縷來水鼠爽氣襲於床頭
啖罷哀梨好風生於帳裡迫而視之是編斯在夫其語必
生新篇皆矜俊龍編鳥篆書得之壞冢之中禁臯侯鯖味
乃在庶羞之外么絃急拍務尋歷代之遺聲迂叟漫郎詎
錄三唐之殘客問石家之廝養衣火浣者三千詢趙氏之
璵璠酬名城以十五洵他選所莫收亦諸賢所未逮者也
然欲私之篋衍既恐令其破壁而飛念將懸以國門又難
使彼不脰而走不揣鄙人質之大雅但獲稍加嗇縮便成

文苑之奇觀儻其廣致揄揚尤屬詩壇之嘉話始則計卷以徵資後乃償書而給直勿云刈桂炊珠君乃爲此度越恒情之論所賴鐘鳴谷應世自不乏流連古曲之人謹啟

徵萬柳堂詩文啟

都城海岱門之東沙河門之內有地一區益都相國馮公顧而樂之節縮其祿米所入買以爲園名曰萬柳堂先是元廉公希憲有堂名萬柳距都門不三十里而近當時趙承旨諸公多作詩歌以詠之其遺址在今豐臺左右公慕廉孟子之爲人又園中種柳不啻以萬計故仍以爲名爾其迢迢紫陌袤蘆屢歷歷黃圖遙連厓賺物豐氣盛暝龍樓鳳闕之光沙暖泥融分蓮勺杏園之勝扶輿蜿蜒直衛天垣碩大蕃滋原綸陸海百昌熙熙地則居日月之旁萬彙芳菲上乃有雲霞之氣乃復林壑澄鮮郊坰明瑟不離闌闌澤以秀而能曜雖處京華土以敦而彌壽風喧夕碓已無三市之笙簫烟靄晨鐘竟隔九衢之車馬紅牆三

里犬抵僧廬白板千家居然村舍川原寂歷頓成華子之岡溪澗崕泓不減袁家之渴野芳襲襲境尚緬而先迎空翠陰陰路非賒而仍誤如尋栗里舍此安之若訪桃源去人不遠公乃體崇卑之撰積德積刑濬仁知之胸樂山樂水經綸泉石抽黃扉補袞之餘絲揮灑烟雲藉紫閣爲霖之鉅手若夫纔竊鶴逕便得清蒼一渡虹梁遽然空澗紅藤百折虛堂遙峙於林端碧鮮千盤傑閣半浮於天際然而長堤旣窈定須紺岫以榮廻曲檻將斜轉頰清湍之漱激假使峯非峭蒨奚以顯層樓複觀之奇如其水鮮淪漣何能覩月榭烟廊之致爰乃躋巨靈之掌只擬成河繫彭祖之腰惟圖觀井黎陽有土漫勞夸父以移山燕市無臺終想女媧之煉石纔聞覆蕡須臾而頽壁騰空乍見濫觴

俄頃而素波衝岸穿渠決溜翠競粘天架壑支峯蒼俱拔地簷前流流任呼白鷺之洲窗外森森直喚青猿之洞嵌之臺榭歷亂於丹崖絳嶺之中被以房櫳參差於雁子鳧雛之側何期輦下孕此仙都不信人間逢茲福地此固東漢王根之宅青瑣非華栱亦南陽樊重之家綠墀掩嫭者也然而客起而言人將有請昔者永嘉太傅墅曰東山洛下相公園名獨樂未央宮外非無蕭相之田園畫錦堂邊不少魏公之邸第以及裴家綠野李氏平泉紅薑紫芋預營歸老之圖白酒黃雞早辦引年之計要皆不違粉渝未踰桑梓南翁北叟徜徉里社之間西陌東阡嘯詠鄉關之內公則故園北海舊業東齊且又屢申予告之祈頻上乞身之表而乃結廬越境築屋他鄉峯雖落雇安能挾以俱

飛石縱成羊未必鞭之便走所慮關梁迢遙難浮天畔之
槎還嗟樓閣虛無徒結海中之市情寧易喻理或難期莫
窺君子之心未測通人之意不知公也捐一切而不居棄
萬緣於何有翔於寥廓寧爲燕雀之謀視若塵埃不慕爽
鳩之樂付託則園丁牧豎無非此地之主人總管則山鳥
溪花便是吾園之家督相逢野老竟許看花但值高人何
妨載酒聊成故事敢云來者之無賢大似閒田竊恃故人
之知我於是栽之櫟柳間以楓杉永豐闌角乞來跪地之
長條灞水橋南借得銷魂之弱縷或自亞夫營裡折取數
枝或從子夏市中移來幾本或憐擁腫幾同宣武之十圍
或愛蕭疎大類泉明之五樹或將眠而乍起曾遮何妥齋
頭或似筭以如擎夙植王恭閣後莫不延緣坂隰麗縠坡

陀倚曲水以輕狂竚廻風而甸線鶯黃乍醉已成二月之
花蛾綠方闌便作三春之雪時則蒙蒙欲下只繆絲韁漫
漫將飛偏繁繡騎游童絡繹競投光孝之坊貴客連翩儼
入康崇之巷固已都下共傳爲勝蹟奚止羣公皆奉以美
談然而揆厥由來推其所自僅侈游觀之美詎是本懷惟
矜眺覽之宜要非篤論彼金谷銅駝以後旣高臺曲館之
何存卽津陽沁水諸園并細柳新蒲而不見鴛鴦灤冷滿
湖飄墜粉之紅螞蟻墳空獨夜咽殘花之紫終成昔夢徒
記前游空存前代之亭臺未審何年之羅綺達人致嘆曠
士增歎公則午橋莊裏育嬰兼以放生奉誠園中仁民因
而愛物史譏染指何心鼎內之龜易象朵頤詎忍籃中之
蛤從此雀辭楊館定解懷恩便令燕別張巢還思報德至

於生憑廩竹亦荷矜全源出空桑咸資顧復夙依螺羸
熙多含哺之民小字於菟粲粲有圓橋之彥公所育嬰者爲弟子員者此皆功德之難刊祇患渝揚之莫罄伏冀同人共賡雅唱
或詩或賦千章謝眺之吟爲序爲銘滿架徐陵之筆庶使
楊林渡口長謠君輿之甘棠將期桺宿星中其指公孫之
大樹

請周翼微篆刻圖章啟

月晴紫陌只照青衫秋老渾河漸添黃葉荆軻一去市中
饒感概之人樂毅無歸臺畔足飄搖之客爰有汝南才子
婁水名流摛文則翡翠盈箱織句則蒲桃竟幅固已江東
僑肸推以君宗河北溫邢呼爲祭酒爰觀石鼓偶客金臺
劉公幹之逸氣籍甚鄴中王輔嗣之清談斐然都下五侯
接席都爲樓護傳鯖千里知名競以陳蕃下榻昨與同人
爲言剽技周瑜顧曲之暇間涉說文伯仁飲酒之餘兼摹
繆篆爛銅破玉頻鐫蝌蚪之形漢印秦章屢畫蛟螭之狀
然此微長原無足述如斯小道亦又何之僕篆而言君何
不達今夫華章麗句或偏知已之難迎鉅製鴻裁恒慮賞
音之莫遘若夫見蔡中郎之鳥篆則傳觀盡訝其精覩戴

安道之雞碑則好事羣驚其妙蓋形而下者易爲知形而上者難爲喻也然則聊爲游戲何妨暫揮郢客之斤姑與周旋何須不刻宋人之葉嗟乎絕技可傳多能有屬祇論一藝願諸君無失此人若問其他恐當世竟無其亞譬訪君平卜筮亟趁其百錢罷肆之前如求王宰丹青幸需之十日一山而後謹啟

徵刻今文選今文鈔啟

粵稽結繩邈矣代有篇章斷竹斐然人多述作洎於伏勝陳農之輩沿及王儉任昉諸人藝文之錄價重連城館庫之林名班七畧然而間有亡書悉多善本書滌左癖好古者奚翅連珠宋艷班香臨文者寧惟編貝逸詩缺史行是丈人汲冢秦碑禮先一飯此旣無藉於表章我亦何煩夫鈔撮若乃勝衣所見每遇上流總角之交恒逢才子左家藩溷借鉛槧爲畋漁王氏巾箱以文章作衣食斷自本朝而上溯乎就傅以還會通音驛名作居多間奉鞭弭高文不少遂燃脂而暝寫爰弄墨以晨書不幸中更兵燹游歷亂離帳中之秘與銀雁以俱飛篋衍所藏共珠囊而不見他若庾開府生平所作五存五亡杜荊州疇昔之碑一山

一谷允諸遁甲以及秘辛老兵旣裂以補袍里媼亦藉之
覆醬殘通惡棧爛然四部之珠英敗紙烟煤宛爾五車之
玉屑集逢作賊視沈約而彌慘詩供擣蕕較義山而逾酷
能無歎息良用酸感是以購彼雞林撰其象罔都爲一集
派以兩家數秦漢六朝者入蕭齊文選之中倣韓柳歐蘓
者歸茅氏文鈔之部庶幾兩美要可單行所望高賢共成
勝事至夫徃昔篇章古今墳索上著作聖世之笙簧下者
代閒居之博奕若有性喜刺譏語工怨詠宋玉旣口多微
詞孫盛復直書時事者鄙人恆怯不登楊惲之歌君子溫
柔毋爲趙壹之賦有一於此勿付典籤苟有他樂敢求記
室謹啟

公請靈機和尚住善權啟

伏以花卿鹿女結精藍於千香十地之間燈繞鵝黃架寶
筏於雙樹三車之外蒼崕紺巘總是禪林碧乳銀膏無非
定海恭惟某和尚名在金函派分珠巒波提東度得智水
之一珠祇夜南翻拾雪山之片玉惟茲陽羨之區舊有國
山之寺山林寢寐何殊香積之龕巖嶂幽深卽是王城之
里雷書似蚪旣爲三李相拏雲攬霧之鄉栢偃如龍亦屬
百老人沐雨櫛風之地自象教之凌微致魔烽之跋扈紫
衣賜號乃益鶻張白馬傳宗翻營兔窟歎南風之不競來
東隣之責言於是花宮控鶴爰聚諸僉義殿翔鶴都歸一
炬三千尊者盡爲原上之龍蛇五百沙門俱作崑岡之玉
石袈娑煨爐瓶鉢蕭條三生堂上便成糜爛之邦碧蘚庵

中卽是省窓之谷竊咸陽之三月山鳥啼紅傷建章之千
門林烟罷綠行人於焉躡躅過客以之徘徊然而祖墳猶
存祇林斯在凡此迅雷烈火之後尤賴補天返日之才金
百鍊而愈剛錦三繅而益麗伏願早泛慈航重開寶地擊
塗毒鼓於狐狸虎豹之窟風月如新建精進幢於蓬蒿藜
藿之塲山川重秀矣

謝柯翰周惠爐扇啟

裁來皎月詠自班姬渝得香雲製緣丁緩瘦骨截湘妃之
竹蟬雀分行同心煎荀令之香鷓鴣成片睡茱萸之複帳
有鴨皆紅舞翡翠之晴窗無鸞非彩擎俱掌上藏並奩中
然而九華乍御金獸先啼四和纔烘畫羅遙妬維四時之
代謝故兩美之難兼並荷蘭閨之澤恨不同時俱邀柘館
之榮愁難相見今某雙承雅貺兩藉殊頒握彼兔華之下
驟識春邇擁於麝火之傍旋知秋盡無冬無夏咸銘喻量
之施倏燠倏寒彌切撫時之感

代友人謝送湖綿花褐選頴燈檠啟

七襄駝褐桃花映水以爭鮮萬縷紅綿柳絮因風而乍起
產於塞外叢編載毫端之名浴自益中勝史記芮溫之號
至於日之夕矣在旁惟一二燭奴客且休乎侍側只十雙
毛頴孫康則映階少雪祇圖續命蠚膏江淹則入夢無花
長冀乞靈鼠尾俱珍藝苑並艷書帷今某東海釣魚詎有
輕肥之望西萃衣葛敢興安燠之思巍毫秃盡班生投矣
而未遑鳳脰燒殘山鬼吹之而亦得何來高誼逮及羈人
綸帶捧至艷欲凌霞紕絮貽來柔如疊雪曳之沃若布何
羨於賓人繅處卷然紅定煩夫女手別有淡情託諸長物
年年鑿壁贈伊懸火之銅缸日日鈔書貽爾臨池之玳管
管城子脫冠以至一架珊瑚不夜侯秉燭而來兩行齒苔

送陽文集卷四

從此躋筐蠶績頓忘范叔之寒自茲鵝帖螢窗益進昌黎
之學銜恩莫罄鏤德何窮此啟

翰林院中書舍人謝友人賚安石榴啟

而未駐風塵孰知山泉大之而在野河來高丘良木深根入
號張之望西華天萬緒興安興文思懿漢文盡成土之外
是冀子靈鳳鳳具冬華並濃苦難今卉東華茂然晴育
手無惡疾此都山里源頭對金波青玉紫霞人夢寐游
至大日之文矣五象卦一一微爻客且才平貴潤月十變
重不寒心葉韻芳多美之子有白盆中翠安流青墨之
子英顏勝珠亦知才以身輕薄則理制辭清因風而下
升友人機善博雅文詞更見其妙

謝友人賚安石榴啟

壓簷宿吒產自塗林隔膜臙脂呼爲丹若張騫槎到新移
海外之枝李靖編成夙號天漿之汁既可施之作枕賦就
張紘還堪染以爲裙詩裁武后縣焉似瘤旣標劉杙之名
重可論斤亦著離斯之國某愁同平子渴類相如幸沾珍
果之頌獲寶上林之味刻來筵上纍纍不夜之珠藏向奩
中歷歷記歌之豆偏譏栗罅殼冗青毛欲鬪離支絳籠紅
肉詎止伽藍作記白馬寺之甜實直牛須知伯起曾言安
德妃之榴房多子飲君雅意貺我成言

謝園次賚衣啟

鴛鴦作匹扶風織錦之家蛺蝶爲羅叢臺袴服之客今某
裘類蘓秦服來久敝衣同到溉着處恒穿猥以班荆於焉
贈縞仙園獨繭擣須新市青砧鄰館雙絲濯用成都粉水
訏獸鑪之不煖憎鶴氅之猶寒遂使季路縕袍忽現藍花
之色將見原思露肘俄成緹葉之形姬人裂帛競詢何處
紅蠶嬌女挽鬚預索此中紫鳳

珠韻徹文房遠所索此中榮鳳

之音與良原思數根錯處知葉之沃張人琴帛散而叶之
始連聲大不覺曾無夢之餘來微才幸翻繁林於此
龍壽山因識高雅於萬古誰是君也豈知其事是早知
矣解蘿乘烟來入故山知此皆昔我所遺以求得此身
蓋若朴羽天風舞縣之來煙樂未承遊臺云烟之寒今更

謝劉王孫示西洋諸器詩啟

青宮愛子會傳如意之銘朱邸親王夙擅屏風之作十層
胡粉解染妍詞百竚蠻箋工書艷曲錦襯與蟬鬟並亂金
筒共麝月同飄某深媿陳琳幸逢劉向賛來蝌蚪凝焚辟
惡之香躍出嬾隅似被若亡之縠光同不夜體比宜春假
令司馬爲郎還通邛僰若使仲容追婢定是鮮卑青宮一
作綠池

十層一
作滿籠

直是老廩之作子山不及

周壽王評

謝吳伯成明府賚酒米并炭啟

條風未播誰貽范叔之綿珂雪將零只減梁鴻之竈畫從
馬援豈足療饑喫自樂巴何由取醉食惟一溢年年貸向
監河量減三升夜夜酤從蜀肆乃者辱憐臣朔之饑猥念
寬饒之醒春成精鑿與綠蟻以偕來刈自瑯琊並玉姐而
俱至除芭紅稻聚來作城郭之形壓榨金漿釀就得雲霞
之氣況頒擣炭用代燃薪貯之寶鴨鳥無事於避風刻作
紅獅鶴奚爲而訝雪

戲與李渭清索餅啟

段家食品先譜牢丸荀氏饌經尤推薄夜洩成飴餽易汚
靈寶之衣蒸作餚餉慣賣安丘之市齊民要術競傳不托
之名南楚新聞亦擅紅綾之號在六季則呼之爲餌至兩
川則名以爲餔詎須臾皆纔賦安乾寧假虞悰惟誇米糲
僕樂託掘門棲遲藿食家原吳地夙耽鰯菜之風游到梁
園偶習餕餧之味酒爐燭麝偕鈴卒以加餐葱肆瓊璫共
騎奴而屬饗自客都亭長懷宛雒人非雁鷺何來澤畔之
糧行類侏儒并乏囊中之粟猶憶前宵曾蒙設食膏環一
捻玲瓏映字以俱明粧妝干堆柔弱因風而欲起徧驕座
客還詫家僮頗餘望蜀之思仍作發棠之請想何年歸去
細說於荒橋野店之傍來日過從大嚼於淡月輕烟之候

不煩脾膾以恩公爲但有寃焦可遲賓至毋嫌惡客縱懷
矣而何妨倘屬戲言卽畫之而亦可

陳迦陵儼體文集卷五

宜興陳維崧其年誤

遂安方象瑛渭仁

弟維岳緯雲

華亭王頊齡琨湖

選

宗石子萬

參閱

男履端

姪 淵

校

序

瀛臺賜宴詩序

粵以歲次重光支逢作鄂

皇帝方居清暑之崇臺御招涼之邃館用頒大酺式謌羣
工若夫路入東華橋通西苑莎偏泥泥秋未露以何晞樹
只騷騷夜不風而自響霏微殘月銀弓猶掛於高城錯落

疎星珠斗尚斜於遠岫坐平沙之似琰肅侯傳呼藉嫩卉
以如羅遙憑宣喚少焉赤鳥球躍魚鑰爭鳴丹鳳書啣龍
樓早闢雞人喔喔飛繡鞍以遄催虎賁駢駢翼珠珂而並
入紅門寢寐水面已維青雀之艤紫掖透遲柳絲先隱黃
龍之舳俄傳汎艇盡許登舟斯時也太液波紅一奩靺鞨
上林烟碧滿幄玻瓈黃頭擁畫櫂以平搖長鬚撥蘭橈而
競發千衫艾葉映水蓼以彌鮮萬綬桃花雜風荷而倍嬌
鶼鶼唼呷四圍皆王母靈禽竹栢微茫一片悉姮娥寶樹
中流遙矚青爲好時之田極浦凝眸黃是昭陽之瓦誰知
帝室皇居之畔別自成村未審南唐北宋之間疇工此畫
行到瓊樓玉宇天上晴多除將鳳舸龍船世間秋少爰乃
停彩筆弭牙檣陟坡陀沿峭蒨屢遵輦路距帳殿以非遙

幾折襟垣隔幔城而不遠山呼以拜魚貫而前時則瞻蹠
綺旭赭袍隨繡緘交輝葩赫彤霞 御榻屹花磚相向忽
覩紛綸之狀陳於殿廡之間夫其疊繪成峰吹紈散霧千
端霜雪割完碧海之絳百篚雲霞販盡平陵之采鶴頭綾
織自尚衣局內球路錦漂從裂帛湖旁雙心檀暉 三殿
齋來五福鉢窠 九重飛下瓊瓏單複擬綺毳以逾溫絢
縹縱橫筭豐貂之未煖雖使量來玉尺莫罄恩長縱令負
用銅仙難勝覩重何期晝永月墮懷中詎信秋初春還袖
底擎來水涘鴛鴦解妬以增啼捧向林臯孔雀生慚而輟
舞無何而雁翅筵排魚鱗幄比沙明水淨飄颻張紜幕三千
天迥堤平重疊列華裯十二紅蘭壓架恰炤文廊紫萼
成叢偏搖黼帳銀罍告濯翠金云調然而羊膾雉醢未便

稱珍鴨柵雞纖何由示美卽或弋來紫鵠落雋永於雲端
獵得黃麌致羶薌於海外羹湘錦帶餅裹紅綾牢丸既弱
似飛綿薄夜亦柔如積素抑猶未足以誇禁臠之腴而奪
侯鯷之麗也繫爾臣僚夙饜江湖之味惟茲卿尹半居魚
稻之鄉儻遂庖虛鮎鯉曷用爲歡若其俎乏鱠鯀安能取
飫歟師芳餌乍垂綸於百子池頭饗宰雕盤旋斫鱠於九
成宮外假之雷雨銀簪颯爽以能飛劑以鹽梅錦巖軒騰
而欲動於是頻頒瑤筆滿瀝金觥百壺急送風前之喝盞
參差三雅橫飛樹底之行盃絡繹酒痕縹碧都粘學士之
袍釀色鵝黃齊上參軍之袂漏沉虬箭尋日影之將斜風
捲鴛班倏珮聲之早散重申天語倍荷皇慈堯堦忭
舞冰藕堆空文圓趨踰碧蓮委地盈襟萋芳橫拋興慶之

緋珠一握葡萄亂灑平陽之銀豆駄裝寶馬共駕綃以纈
紛構出銅龍滿鳳城爲歡笑九衢迎問何來方朔之桃萬
戶傳觀不數河陽之菓臣綴微班猥叨異數才慚鮑俊菖
蒲賡燕鎬之詩文遜班香芍藥奏橫汾之曲

九日黑窯廠登高詩序

若夫赤車聘士京都開碣石之宮黃屋招賢輦轂闢翹材之館高冠長劍結韌而至者三千廣廈細旃抵掌而談者十九昭王臺畔夙稱買駿之鄉元禮門前新有登龍之客時則太史趙鐵源先生天水名家營丘聖姓金閨掞藻玉尺量才西園旣文舉開尊東郭復當時置驛則有敦牂紀歲金虎司晨商飈激於蕭林灝景凝其素節渾河一色雲中之雙闕常紅落葉三關塞上之千峯忽紫霜曠縞晝耀橘柚之金穰月魄澄宵綴茱萸之綠纈斯時也稷下游譚之士弭節高秋梁園詞賦之賓剽纓上國文成騷辨莫平楚客之心景值蓴鱸易入吳人之夢非無魯酒寧便銷愁不有燕歌何能遣興先生乃練茲時日載萩蘭肴召我賓

明爲斟桂醑然而九衢車馬誰爲汎菊之名區三市塵囂
不繙題糕之韵事匪尋僻地曷暢雅游於是長楊直去竟
得空臺下杜斜臨還逢古榭水雲曠淼樹颯颯以吟風沙
嶼清蒼葦蕭蕭而捲雪爰乃幽人藉卉上客攀條乍敷衽
以論心或憑欄而送目人逢高會幾忘異地之關河天放
新晴不送滿城之風雨飛觥鬪筭賢主旣迫爾而成吟拂
素題箋嘉賓亦斐然而嗣咏詩分各體人限二章嗟乎桓
南郡賦詩橫槊參佐風流劉彭城戲馬高臺賓徒慷慨於
今不再自古空傳黃花挿鬢徒添落帽之狂白雁橫空祇
切悲秋之感年年漉酒惟存陶令之巾歲歲尋花慣作駱
丞之序僕也恭聆逸响知紀勝之重逢遙隔名筵悵從游
之有待爲平原而買榜千秋公子之無過燕市以登高一

卷大夫之賦

萬柳堂修禊倡和詩序

蓋聞歲紀上除詩咏秉蘭於洧渙春惟元巳史標蹠柳於
華林都下盛洛瀆之戲千里安期山陰流曲水之觴興公
逸少顏特進騁華文於劉宋花在毫端王寧朔騰逸藻於
蕭齊春生楮裏三月三日水面麗人一咏一觴林邊名士
亦云在昔以迄於今則有韋曲名莊平泉別業黃扉上相
欣逢戒浴之辰綠野元公喜屆祈蠶之序鶯遷郢外高閣
仍開蝶舞花間小車隨到裙屐簇謝庭之子弟輜輶溢馬
帳之生徒時則上陽宮外積靄初晴宣曲觀前遊氛乍斂
天裝卵色皴成雙闕之紅岫抹雲藍滴作萬家之翠綿羽
旣躡躅乎綺陌新荑亦溶漾夫銅溝鞭絲帽影爭窺白傅
之池臺松韻泉鳴競和東山之絲竹蘭肴載菰桂釀斯芻

我師爰呼四座而言此樂實駕千春以上生民之始厥有
豪雄自我而前非無賢達間復流連節物撫弄景光然而
星移物換竊或因身世以停歌樂徃哀來寃且睠關河而
罷酒縱復放懷清曠陶情詎遂以忘情寄意洋洋齊物亦
何能遺物曷若鄭子產之池內長有生魚周茂叔之窗前
雅多青草流行坎止悟大造之無心今是昨非笑前賢之
多事詩成七律人各二章庶幾南樓清興老子何減於諸
君依稀東魯高風狂士偕游乎童冠云爾

鄧孝威詩集序

臺君土室漢世目之逸民劉氏綵毫梁室官爲庶子遐稽
曩史兩見孝威詎意同時又逢我友序闋閥則鄧仲華簪
組之族門戶清通譜邑里則吳夫差花月之都山川綺麗
籍雖茂苑產實吳陵諸侯傳寓公之名才子擅客兒之字
馬卿慕蘭便號相如傅燮懷賢爰更幼起爾其才情迺艷
文藻英新釋寶誌識徐陵於早歲呼以麒麟陸修靜知張
融於綺年遺之鸞羽東京公子許以經過西鄂王孫嘉其
延攬於是臨風授簡入夜揮毫等白璧之一雙似朱霞之
十丈鏗鏘金石能驚趙鞅之魂煜爍烟雲可致賈妻之笑
書之形管縉以牙籤僕也激賞高文徘徊麗緒陸平原之
詩賦道路居多庾開府之生平亂離不少若夫魏主虛帳

韓王故臺昆陽虎鬪之城涿鹿龍爭之地才人失職幼卽辭家烈士依人長而去國三秋作客徒悲峽裏之黃牛五夜思鄉難忘關前之白雁況復燕昭臺畔猶有遺宮羸政山頭非無疑塚青桐綠竹盡諸王帶礪之鄉玉雁金鳬亦列祖衣冠之地而乃墮名藩之愛子損長陵之一坏此也十七世之金甌彼也千百王之玉體莫不竄之狐兔荐以荆榛見草中之馬耳能不悲號攀天上之龍胡可無痛哭於是觸目蒼涼緣情悽厲或臨文而永慕乍搦管以微謠絕非愉懌之音惟以悲哀爲主縱使縣名聞喜豈便爲懌卽令草是忘憂焉能不嘆嗟乎蘭因芳頃膏以明煎自古文人皆嬰此患羈雌啁哳豈有意於謳吟怨鳥蕭騷聊自言其辛苦屬以風高飼性同使者以乘槎月令朱江其名威之近集也

星而泛棹聽蠻方之秦吉食炎徼之檳榔過嶺一編乃孝

昌黎文集序

如臯冒子無譽者族望通明門風清邵江東王謝葉葉金
貂河北崔盧人人玉樹都憲公之挺拔清剛少叅公之通
明英整及乎大父玄同先生一麾出守獨高保障之名府
君嵩少先生三命登朝備極藩維之重有鄙人之父孰實
公子之難兄六館生徒推爲模楷兩京厨顧歸以入宗當
國難之頻膺遂家居而用老雙龍著牋是兒莫不言超兩
少隨肩此客羣知其異無譽生而強記幼便能銘出遊市
上日日乘羊入戲庭前時時臘鳳黃金作埒偏過許史之
家白玉爲錢屢到金張之宅纔離襁褓卽事清談甫着衣
冠遂工艷曲然而人不清狂家惟忠孝大有父兄之訓絕
無紈綺之風揮毫座側衆訝其奇食果園中獨懷其小加

以性愛文章才長詞賦琉璃硯匣皆宋風謝月之篇翡翠
筆床悉陸海潘江之作南朝才子詩曰鴛鴦北地文人體
如蛱蝶擅江花而不落飄何粉以恒香況復閉門等於譙
周漂麥同之高鳳冬釭旣燼不廢吟唔夏簟方清彌勤繕
寫近董相下帷之地無意窺園居大夫射雉之鄉何心索
筴言其腹笥奚讓邊韶論彼書淫豈惟劉峻於是雷塘烟
月爭入篇章覽社鶯花都歸楷墨櫻桃帳底已多贈婦之
言孔雀屏前頗著懷人之什固已餘姚書記錄此新篇因
而長樂名王訝其少作哀夫片羽何止一嚬僕也哀類蕪
城愁深枯樹讀王子安之序我妬其年坐衛叔寶之旁自
憎其穢敢云玄晏用慰清河

龔介眉湘笙閣詩集序

原夫錦斷梭龍驚心奚極絃哀柱雁蕩魄何言文人生戎
馬之中詞客遘亂離之會靈和前殿小侯射楊柳之旗華
林後園公主試桃花之馬過雀臺而獻吊亦有名流入馬
邑而生悲非無上將風月供其悵望江山助其悲懷余友
介眉龔子四姓良家五陵妙族朱門鬪鷗識桓氏之家郎
金市乘羊訏衛家之年少弱齡十五愛此吹笙上客三千
驚其抽簾家近長干之縣夙解看花人居蘭陵之街偏能
賣酒無何而葛榮入北塵暗三臺侯景投南烽馳十郡齊
亡之日誰知袁粲之子孫吳沒之年尚有陸機之兄弟雕
弧乍熄遂射策於春宮羌笛未終便計偕於易水馬援辭
龍香犧如龍庾信入關油車似霧貂蟬盈座盡北魏之儀

同簫鼓當筵遇西宮之協律衣薰胡粉還迎塞上之姬鉏
蘊宮香或贈幽州之客固已譽馳勝趙名重幽并況復性
愛琵琶尤工絃索紫檀作撥句句離鴻金粟爲床聲聲別
鶴雞鳴埭上人傳子野之歌庾家墓邊伎識王郎之曲才
情第一風調無雙嗟乎碧草粘天盡是思鄉之客黃塵匝
地誰非去國之人袁大捨之粧臺風飄蟬鬢馮小憐之畫
閣月照燕釵賦號蕪城文成枯樹欣逢才子快覩名篇自
媿陳人難忘新曲當年宋玉應有雄風此日王筠空吟雌
霓云爾

撮子山義山之長而能自標興會不襲鉛華四六家在
今日當推其年爲第一 吳梅村先生

董少楹詩集序

嵯峨金竈人間無煉骨之方嗚咽銀箏天上有銷魂之曲
南都石黛恒畫愁蛾北里胭脂彌承泫臉張衡處機密而不
樂劉楨限拔垣以長愁地老天荒猿猜鶴怨於是華堂
失火燕雀俱焚滄海無波蛟龍立盡梁世之金樓半燼陳
家之玉樹何歸故國王孫淚洒腰間之玦辭鄉公主心傷
屏上之詩建業風流一朝零落江陵文武千載淒涼八王
既自賊於中五帥復不歸於外嵇康被議撫愛女以託人
范曄臨刑顧名倡而隕泣食子都無下意傷哉蕭賁之談
下官不解著書達矣上黃之語時則城名白紵獨數董公
系本烏衣尤推德仲申包胥倚牆七日毛修之亡命三年
蚤歲聲萃便如潘陸壯齡遭際畧類庾徐令子少楹居然

俊物羨北朝之甲第父是崔㥄問南國之門風兒稱孫策
楊梅作對傳是童年鸚鵡成篇由於半刻銅盤會食炊金
饌玉之家丸髻行歌換羽移商之伎巷頭梔子皆是同心
園內護花無非蠲忿石尉之珊瑚碎後衆譽豪奢王郎之
團扇擎來人憐放誕畫眉京兆比此非奇使酒將軍擬斯
應遜尤工文筆酷擅才情東海三何時有緣情之作西宮
二應不無累德之言體格輕華情文悱惻頭陀寺裏爭看
才子之碑景福殿前競寫名流之賦雲霞十丈如游樊重
之門金粉千重似入王根之宅僕本恨人生丁亂世覩夷
光之貌憎類無鹽讀君山之書歡踰猗頓舊有清河之癖
甘作狂夫新爲記書之評慚非傑作不辭玄晏願附青箱

周鷓垂詩集序

燕筑爲傭流悲曷極吳簫作乞屑涕何從姬人當大去之
時公子正不歸之日望將軍之樹風月俱哀嚮帝女之桑
關河交愴將花比面但掩啼痕似鳥能歌誰開箋靨則有
家居小市夙稱丞相之賓飲若漏卮舊是諸王之友北齊
才調獨數崔㥄東晉門風共推王述便令擲地聲已應夫
銅丸假使凌雲譽更騰乎文陛固已房中侍婢難辭團扇
之投肆上游童輒擬明珠之贈而乃世丁不偶數值多奇
痛徹青衣蒼茫北路寃深白帽跋蹤東藩此則輟曲奚疑
彼亦摧絃不顧乃若汝南望族偏擅才情江左名流只鍾
羅綺六齡應客已早辨夫楊梅七歲爲兒遂預知夫苦李
鬪邊鬪鴨原冠諸童字裏雕龍還兼衆體對於殿上言叔

父之非痴索彼座中覺此客之小異交成樗杜半是金張
文出齊梁無非江鮑況復青春公子白塵王孫總角入關
綵舞仙郎之省勝衣適洛橘懷公主之園四姓知名上銀
街而走馬六朝遭亂過綺陌以吹笙好學楊愔居列銅盤
之食小年衛玠出乘油碧之車有客能文何人不羨珊瑚
作架詩比徐陵鸚鵡成杯序來庾信筆箋製引家傳曹植
之辭芍藥名篇戶說王筠之作莫不玩同趙璧握類隋珠
姹女數錢只給碑文之價卓家賣酒欲消才子之愁白玉
當窗黃金押角訢冬缸之不煖憐夏簟之非寒絕似五車
差如七畧於是路出青溪人慚玄晏懷人悵望孫周橫槊
之鄉千古流連張孔梳頭之閣盼臺中之衰柳消盡黃鸝
彈輶上之枯桐飛歸白鶴

佳山堂詩集序

命鴈分官以後肇始篇章斷鰲立極而還權輿述作姚廷
吁咷半臯夔渾噩之音姬代升歌多旦奭春容之製牒著
繫彖理本元公緝雅稱詩義緣上相莫不仰規天漢俯察
華蟲舒慘協乎陰陽清濁調乎律呂麟麟炳炳矞矞皇皇
文字之興由來尚矣且夫言以旌心文原載道若使情弗
篤乎君王志不存乎民物色工朱紫徒成藻繪之容韵合
宮商未便克諧之奏縱復博綜正變雜換高深審音者例
之自鄙無譏觀禮者歎爲旣灌而往蓋自昔興文要於養
氣從來立德方許著書辭須能達此言鬯自宣尼思貴無
邪其說原於魯頌必膏深而光沃斯理沛而詞昌往說雖
多斯言不易我夫子益都相國馮公光嶽分靈穆明一德

樞機密勿龍馬佐其苞符參贊經綸日月資其紀綬孕灝
博兩間之氣有而不尸滙汪洋百谷之墟積而彌讓毫都
負俎躬調五味之鹽梅元子徂東手補千章之袞綉番番
格人之貌泱泱大國之風於是暉映三才發皇萬有龍文
扛鼎嚕吆鞚轡之聲鴻筆摩空擎攫連蟠之狀周情孔思
杼軸吟謠夏鼎商盤雕鎌籀篆卿雲之麗碧落卷舒本出
無心大海之生紫瀾浩蕩仍歸何有若乃九霄退食三殿
書思蒿目時難盡懷國是歎客雲之不雨望切虹霓懶滌
水之懷山憂深昏墊碧雞乍梗嗟戌卒之化離金馬旋開
感征夫之況瘁年年下瀨樓船則楊僕遲歸歲歲橫江澤
國則盧循尚在以至星飛紫宰屢聞宵旰之朝甚而地坼

黃輿偏警殷憂之聖懲殷魏闕思謝政以美從念惜蒼生

欲引年而未可謂予不信爰作歌以告哀問我何求用賦
詩而見志蓋臣納膚語必纏綵元老匡時言皆忠愛絕少
憑虛之論原非漫興之言然而秋盈綠野時致門生春到
黃扉恒招屬吏或飛觴而命酒每授簡以摛文偏師一奮
砰鎗喧八月之濤險韻重拈撤捩激萬鈞之弩行間光怪
盤硬筆以橫飛楮上騰掀蘸渴毫而突起客嘲賓戲亦莊
亦諧西竺南華半仙半佛此則語多寄託仍爲有謂而然
義屬與觀詎是無因而作陶融元氣終難越其範圍籠蓋
羣倫鮮或窺其涯涘也崧以菲材獲承隆盼道旁苦李過
蒙匠石之知爨下焦桐謬荷鍾期之聽雕慙宰我鑄愧顏
圃猥於鑽仰之餘得與校讐之役於是部厥紛繁釐其前
後同西園之子弟商訂魯魚偕東閣之生徒整齊亥豕懸

之通國副在名山極知卑不頑尊愚難知聖敢矜蓮叩思
擬議夫淵深遑恣管窺冀稱揚夫高厚祇以一堂請益數
載從游畧綴輯夫俚言敬敷陳乎末簡竊比卜商握管弁
毛詩之首粗同安國濡毫序書傳之前云爾

林玉巖詩集序

若乃星入女牛疆開甌粵梅還作深仙人種芋之園鯈欲
成山龍女昇天之島碧蒲滿縣洞壑崢泓紅荔垂街人文
光麗則有門風簡劭才地瑰奇驍騰彩筆人居延壽村中
的爍丹輪家傍望壺樓畔韶齡釋褐夙簉金闈綺歲登朝
旋簪銀筆蔚然名位洵稱九牧高甍籍甚聲華詎數四門
博士無何而烽搖犀浦浪激蛟宮王審知旣豕突於南荒
陳寶應復鯨咷於炎海無諸城上萬帳蠻雲歐冶池邊一
軍毒霧家分兩地信斷三年王仲宣之邑井一半凋殘庾
子山之關河大都蕭瑟吟成莊鳥愁極鐘儀姑染翰以告
哀或援毫而寫恨旣而降王就縛蜃市長消叛帥遭擒鬪
帆大去文人返國重尋甘蔗之洲才子還鄉再訪桄榔之

樹而乃君謨舊宅一片斜陽漁仲空園無邊蔓草披葛謁九仙之廟斷鏃猶紅攀蘿緣雙闕之峰沉戈半紫縱復相逢蟹戶一問蚶田而巷陌徒存山河頓異上慢亭而躡躅老籜難認曾玄撫榕蔭以躊躇阿圃空呼郎罷越禽向暖不知栖何樹之枝海燕歸巢未審上誰家之壘獨流連而自惜長頤領以疇依假茲側理以瞻宗邦藉彼喻糜而瞻故國一山一壑盡平生射獵之場某水某丘咸羈貫遊從之地吟謠不少篇籍遂多況復京華仕宦厥有羊何臺閣翺翔頗多潘陸一門標令王家則渾濬聯鑣羣從風華阮氏亦藉咸並轡何常不吟盡林巒賞窮烟月疊縹囊於珊瑚絹翠帙以珠繩也乎且夫玉巖山者固閩疆之巨嶂而島石之靈源也金膏玉乳集皆觸合以科飛石屋朱雀對盡摩空而怒拔洵塵寰之初地信欲界之仙都爰將二西之山勒作一家之集携之嶺上赤鳥廻繞以羣來藏何船中錦鯉盤旋而不去

錢寶汾詩集序

八音迭奏始自后夔六律相宣盛由師曠竹生峽谷能驚
庶女之竈桐出龍門憤下貞夫之涕情緣義起聲以心生
朱邸成仙還說吹笙之麗藍田作苦猶誇挾瑟之歡吾友
寶汾弱冠乘羊成童蠟鳳茫茫多感始知衛玠之非虛濯
濯爲姿羌有王恭之足擬人如白玉我識子春體是芳蘭
衆推景滌屬以家風綺麗族望清華紅燭晨燃武安則太
后之弟朱門夜啟驃騎則第五之兄旣武子能知叔父之
痴亦安道常言家第之樂乃若翩翩下杜只住銅街奕奕
長楸但尋金彈沽十千之美酒寶匱當爐問三五之名倡
香衫夾轂秦宮小婦夜抱瓏瑜霍氏諸奴春馳桃李賓催
博進銀作樗蒲騎召教坊玉爲捍撥集裏載紫宮之曲增

前來綠幘之人況復開府哀時常嗟枯樹參軍遭亂每賦
蕪城白腹黃牛金卯有民間之識青絲白馬壽陽來市上
之謠悲不自堪泣將何及陸機祖父無非吳國之臣袁粲
子孫竟作齊朝之客於是誤河內之新聲製宮中之別體
思非一致緒有千端猗彼纍臣情不忘夫南櫟悲哉故將
思欲用夫趙人

董蒼水詩集序

蓋聞鳳凰既奏不假響於焦桐鸚鵡甫銛詎借靈於鈍劍
辭宮班妾何心長樂新粧去國戴媯息意淇泉巧筭東隣
有婿徒沾淑女之襟北客言歸祇墜流人之涕然而床號
珊瑚曾爲女弟釵名琥珀舊是諸姬看隔河之新婦不禁
神搖蓬出閣之佳人復爲心喜況復描成石黛獨冠南都
傳罷臙脂已空北里圍團枕畔懸壓角之紺珠瑟瑟幕邊
鎮連心之紫玉東吳有女死化鴛鴦北魏多兒生呼蝴蝶
固已三千紅粉讓此纖腰豈徒二八青蛾訝其素手有友
董君人間才子衛玠綺羅之歲便擅清談黃香髫亂之年
早騰英譽顏家羣從是延之盧氏諸郎君真思道加以
家風槩戟門地簪纓世世作官人人有集袁楊七葉無非

綠柳垂門陸孔兩家盡是紅椒金壁何駙馬東朝名士粉
浣朝衣苟令君西府詞宗香留坐縵猗歟姿制宛矣才情
甲夜觀書獨憑蒲萄之席丁年結客齊開芍藥之欄邊鸞
袁虎跋扈行間謝草江花飛揚字裡共美玉杯之裔有茲
金粉之篇憶昨西風同予南內揮毫自命盡看花研桂之
人被酒相呼悉拔地倚天之句喟諸賢之被欣喜我友之
先鞭雅命元龍序其雌霓嗟乎技乏吹竽寧是逢時之客
賦成破鏡終慚下第之人孟郊之有國難歸羅隱之無腸
不斷須知姊爲皇后稍紓趙女之愁所幸兄作將軍差壯
衛娘之色敢傾腹笥用報行厨

龐公詩集序

碣城高峙北控幽州濡水長流南包趙郡古宅則仍名扁
鵲藥果紛敷荒臺則還說虞丘關河崎麗則有燕地高閣
鹿門萃胄邢邵之才偏綺燦世籍任丘龐公之性本風疎
代生高士爾乃連祚辭條轟厯筆陣璆琳滿篋目空誤餽
之叢談油素成惟氣短奇恆之雜俎公車對策名已噪夫
長安椽燭修書文復登乎作者加以厭拘鄉曲耻伏丘園
曾游晉魏端木爲結駟連騎之徒少客并汾蘿季實憑軾
樽銜之士爾乃河衝兩戒日出中條廣武則禿髮烏孤之
地處處雲多姑臧爲沮渠蒙遜之鄉年年春少逼侯甲第
月明盤馬之塘美女丁年花放野狐之落臨風吊古曲是
烏鳥釀酒登高噫成堆堆況又故人遠別飄零爲胸臆之

蠻好友長離貧薄類鶴觚之戍
秀公集中有懷劉長馭回
秀才詩秀才時陷賊
思此客邈若山河數舉其詞颯如風雨向子期作賦大抵
懷人庾新野勒銘無非思舊僕也邑豈魯邾徒嗟異地交
如王貢所幸同朝猥邀敬禮爲定文每許桓譚爲知已何
來爝火謬依列缺之光詎有鉛刀妄逐刺輩之隊屬良朋
之誼諉援弱翰以揄揚不瑞秕糠爲之弁冕須信策名河
北夏爲大國之聲敢言延譽江南洵乃吳人之語

婁東顧商尹詩集序

夜郎蒼莽有地皆黔參井釣連無天不漏千村羅瓦銅腥
出沒之鄉百種蠻獠鐵額縱橫之地野花似血畧不成粧
小鳥如啼何常是曲羈客因茲而憤恨離賓邁此以廻翔
詎意吾賢乃殊所料黃皮縛袴請爲陶侃之護軍絳帕纏
腰願作劉琨之從吏夕陽亭下叱馭而行上東門邊橫刀
以去毅然揮手都無離別之顏率爾論心大有慷慨之致
亦曰健哉吁嗟壯矣蓋其思致雕華才情清綺野王門內
夙多螭豹之才妻子城中大得虬龍之氣千篇芳藥直空
北部之胭脂百幅葡萄竟洗南朝之金粉何況身偕計吏
譽已鴻騖策射春官名偏鵠起花箋乍擘高文已播於寰
中麝墨纔乾麗製競傳於都下但論文筆足壓溫邢若數

聲華可羞袁伏洵所謂江東獨步河內無雙者矣適當天
畔之遐征大出篋中之奇作送君萬里序子一言嗟乎事
大可爲時猶多難陣雲忽起正英賢報主之秋邊馬成羣
尤志士立功之會榴花染綬願君著績於本州柳葉彎弓
期爾垂名於異國勉旃大業早建銅標行矣故人遄揮羽
扇此日參軍出牧長憶君於鸚鵡洲前他時飲至策勲重
揖我於鳳凰闕下

徐昭華詩集序

瀨中夫子偕游細柳之倉毛穎先生並轡長楸之館銅溝
清泚嘯咏方邇綺陌輕陰談諧甫暢相與數朋游於故國
抑且論人物於當年顧謂毛君卿家於越學楊雄之奇字
定有侯芭傳正則之離騷寧無唐勒君笺而言居吾語汝
頻年濩落比歲幽憂人脣瑟而在蘆壇蕭條而無杏藍輿
寂寞半諱言陶令之門生絳帳飄零疇自引馬融之弟子
爰有一人猗歟獨立詎圖徐淑知有毛公隔紗屏而請受
經文濡彩筆而願爲都講擬之賢媛不愧竇妻鮑妹之間
其在詞流何慚宋艷班香之輩余也側聆高論竊慕驚才
神惝恍以靡寧心然疑而未果倘其善謔姑好大言如謂
非誣求觀麗製若乃椒花新句掇自枕中香茗清文出之

袖裏散葡萄之帙約有千篇解玳瑁之裝都爲一卷於是
微吟永晝密咏逾時晨爐燼麝渾忘綺旭之將斜宵箭沉
虬頓覺素靈之欲上藉之索粲何煩再投玉女之驍假以
蠲愁詎須更射大夫之雉解願不少撫掌絕多時則僕也
玩荳蔻窗前之集諸什咸工覽茱萸帳底之篇古詩尤妙
蓋自殷淳作集徧輯裙笄常璩成編間傳閨闥戴媯莊姜
而後世擅風詩諸姑伯姊之傳代沿製作循環織手豈僅
習乎琵琶掩抑丹脣寧第耽夫笙管珊瑚架北爭繙五色
之花箋翡翠窗南競織千行之錦字莫不文縹黃絹曲譜
烏絲倣陳后不平之句破粉成痕效班姬善恨之詞結眉
表色然或新粧甫竟粗曉之無巧筭餘閒畧諧競病答曹
洪之箋皎未免倩人嫁韓偓之香奩將無雙作歌箋下轉

便號綿駒舞袖纏廻遠誇飛燕紅初暈頰得艷雪以逾融
翠欲成螺擬春山而無別正須點綴還藉游揚亦有夙敏
才情素耽文史羸館吹簫之暇卽弄新聲楊家挾瑟之餘
偏摹舊曲然而祇工近體但辨唐音託興則贈遠懷人而
外曾未經心擬古則龍標供奉而還都無涉筆不知前者
乃有陰鏗猥類時賢妄嗤庾信仲卿孔雀從未入其籜籬
都尉鴛鴦何自窺其堂奧絮因風而正弱花裏露以偏慵
緣斯兩者之談概彼諸家之失此則綺歲揮毫非關姆教
髫齡握槧綽有門風小鬟桂子渝薄袂以求題短幅桃花
障輕絳而乞試母原道蘊發函而私訝其精父則徐陵伸
紙而彌嗟其妙固已才高擊鉢何難譽起連城況復別裁
律絕極擅清新上溯齊梁尤多風骨綠楊慢捲魂消贈嫂

之篇新月蛾長色艷催粧之句坐久則梅開鬢上眠遲而
衣寄邊頭索來畫燭體學丁娘倚罷朱欄情同劉媛溫邢
掩嬌定空北部之胭脂鮑謝慚工直壓南朝之金粉吳都
士女從前枉說綺羅越國山川自此不生花草傳向梳粧
記內共許無雙選歸才調集中還推第一僕也天涯薄宦
惜潘鬟之徒凋故國難歸悵江花之早謝酒無紅藥聊憑
彤管以消愁花少青棠漫託緗緝而釋忿願爲逸少長學
書於茂漪詎意毛茛反授經於伏氏美誠有是妬亦宜然
爰綴俚言用題新咏問其桑梓于春西子之鄉詢彼綠蘿
四傑駱丞之婿

孫赤崖瀋西草堂詩序

若夫羈人關隴思吳會以難歸質子邯鄲望長安而不見
羽陽離別貴客啼噓易水悲歌壯夫嘆惜故人尚在貫高
則乘��輿而前愛妾猶存項藉則撫烏鵲而嘆羊腸九折
總是飄零鳥道千盤極其蕭瑟更若峽猿善叫代馬工嘶
鶴歸華表之年雁斷衡陽之日金環雙繫將子能來寶玦
單貽自君之出秋風門外非無思子之臺落日山前不乏
望夫之石凡此無情未常不恨何況才人失職志士離家
蕭綜旣大去其鄉符朗亦生離其國此則齊朝天子未必
無愁息國夫人定然不笑者也友人孫賜者江東雋士計
逆名家哦書於言游巷內自爾文人研牘於虞仲祠邊無
慚逸者尋偕計吏爰辟孝廉詎期買駿之榮卽罹掇蜂之

懼崑岡燔發焚此璆琳滄海波飛殃其蛟蜃西園夜市竟連趙壹之囊北里晨粧妾議共姜之室羣憐原憲之貧疇白冶長之枉傷哉亭伯獨竄遼東哀矣幼安長驅塞北時則赫連臺畔明明遷客之鄉疏勒城頭窅窅流官之路雪經春而尚白草入夏以先黃於是吳明徹舊爲名將對此傷心毛修之新作降人逢而下涕魯般雖巧飛木雁以何年班様其衰盼玉關而無路矧復海窮見海山盡多山茫茫蒿里他鄉送襄老之屍謂劉逸民諸子瑟瑟河梁絕域把少卿之袂謂吳漢槎哀纏歷刦愴極窮塵然而真人桑梓大有銅街王者枮榆尤多鐵市李花一樹知爲唐室之晉陽雞犬千羣識是漢家之豐沛金張車騎漸染輕華褒鄂弓刀夙衿節俠時則漢東平禮賢下士蕭何陵染翰謂朝鶴蓋朱邸初開隱隱鸞吹綠池競啟是則今皇之叔父實爲盛世之親藩從游開風月之尊應教命山林之駕又以金雞屢下珠雀頻來換此褚衣還其白帽孺人相對卽是梁鴻愛子能隨居然王霸琴鳴井上酒泛牆頭蝸涎半壁儼然隱士之廬雁戶千家宛矣高人之宅庾子山之著作酸感雖多謝康樂之詩篇恬愉不少屬在京師時逢搖落朱鵞校尉携逐客以俱來玄菟將軍挈征人而暫返用爲斯序聊贈以言嗟乎地老天荒時移物換僕將行矣願長吹伍相之簫公欲歸乎幸再聽漸離之筑

余鴻客金陵詠古詩序

原夫珠囊入漢羸秦鑿淮水之年玉璽歸袁孫策拜丹陽之守六朝宮闕盡屬臺城四姓衣冠半居板渚若夫西曲之子弟處處貂蟬南渡之君臣篇篇金粉衛洗馬永嘉名士實始過江王始興江表重臣用先開府緣夫討逆將軍以後溯厥鍾山隱士之前臨春結綺以及後主之澄心讀曲烏啼爰暨南唐之小令是曰妖浮之極致允爲艷冶之大凡況夫青絲白馬地界壽陽虎踞龍盤鎮連姑孰江通荆益南兗州旣戌接滑臺星是女牛小長干復山廻幕府四百八十寺冶號梅根三萬六千塲衍名竹格然而南風不競難以稱雄北帥有人自然飛渡王敦祖約時憂跋扈之強藩國寶佃夫恒患荒淫之貴近周公瑾之不作呂子

明之已亡殿上則金蓮步步非無今昔之悲江頭則鐵鎖
年年不乏廢興之恨此則城稱舊內定許銷冤客到新亭
惟工流涕於是路出烏衣惟多枯樹橋經紅板止賸荒臺
明山紹之山圍雷次宗之學舍竟陵王讀書之邱貞陽侯
躍馬之塲潘妃酤酒閱武堂前孔嬪飛牋聖仙閣後無不
睠此飄風鞠爲茂草百年社稷徐僕射所以悲哀滿目關
山劉賓客因而悼嘆何常不愁攀玉樹泣上銅街拊鉏瑟
以舒情託銀箏而叙恨者乎君也人如張耳偶贊外黃父
是肩吾聿生小庾屬在亂離之後矧當謠諑之辰用吟眺
以攄愁乃躡躅而弔古李廣對軍中之簿今何時乎江淹
上獄中之書君其是矣

藝圃詩序

蓋聞夏鐫九鼎原非旦夕所成漢起千門初豈咄嗟能辦
蜂釀花而作蜜定費經營狐集腋以成裘恒資襄績宋人
之鏤楮葉請以三年魯客之造木鳩期之數載借非蛟蜃
奚緣嘘俄頃之樓除是仙靈或解熟逡巡之酒三都待鍊
藁乍削以還焚兩賦當研毫縱含而每齎何來巧製敏屬
神輸乃有華文贍同夙構爐熏未熄千章盈芍藥之花鉢
響還留百軸溢蒲桃之樹在作者尚矜其極筆至旁觀益
侈爲美談麗矣名篇猗歟盛事時則迢迢金谷直控雞陂
隱隱銅街袤通鶴市零朱臘粉是前代之空園卧碣橫碑
得昔賢之故第袁太尉亭池闌若喬木斯存文潞公閥
巋然平泉尚在朱門換主空餘故老之流傳青瑣騎箕彌

切佳郎之顧慕舊說萊陽仲子幼便能文爭誇天水次公
賢而好客則有畫省聖郎雄州名守偶作牆東之客潛爲
垞北之游攀條藉卉嘉賓因適興以忘歸散帙攤書賢主
遂濡毫而請賦斯時也紅鵝館裏宿雨催晴碧鴨闌邊嫩
涼滌暑水明天淡旣駛驛以宜人簾滑颯香復蕭疎而稱
意爰披雪蠶用染霜鋒沉思而風雨忽來狂叫而蛟螭沓
舞五言十二半微雲踈雨之吟七律八章多劍拔弩張之
態蓋其感慨在心故爾宮商應手問庾子山之第宅能不
興哀過稽叔夜之園林可無流涕千尋玳瑁一架珊瑚織
成寶罽偏熏石葉之香疊得花牋更養成都之粉飛揚跋
扈筆不能休頓挫激昂文無加點曹子桓城南會獵正獸
肥草淺之時管公明席上清談是耳熟杯闌之後無何而

日隱西嶺星翻北渚小胥腕脫屢促更衣上客神來堅祈
刻燭於是盡敞席珍縱陳櫳韞恢奇淑詭如觀伯翳之經
炫耀焜熿凝入波斯之肆爰有蔡邕籀篆曹霸丹青銅肌
蛀綠綈如西極之辟邪玉暉皴紅艷若南荒之鸚鵡携來
筇杖竹無淚以恒班結就焦團櫻未瘦而先紫六宮脂盡
隱隱啼粧七尺唾壺芒寬氣寧第漆園小吏床頭之蝴蝶
仍來非徒管氏夫人硯裏之鴛鴦不去凡諸長物悉付
短歌憑老興以淋漓橫秃衿而跳盪嚬吆鞶轄渴羨食酒
之聲環銳嫖姚猛士研營之狀憑欄以眺乍蟾魄之東升
擲筆而狂驟蟲吟之四起會且歸矣行當俟後之人于胥
樂兮詩亦如前之數僕也匿影殘冬棲踪他縣一緘索序
難尋避賓之臺五夜成篇聊附折梅之驛攬早謝之江花

徒增予拙藁同行之潘果彌覺卿妍深媿續貂奚堪引鳳
藝圃者姜如農先生仲子學在所居也其先爲文文肅
公清瑤嶼又先爲袁憲副某堂水木清幽洲島開曠最
爲吳中勝處學在讀書其中旁列古彝鼎及茶鎗酒董
諸小物一日吾友吳園次過其齋頭頃刻爲賦詩四十
首學在梓而傳之并屬予爲序云

附記

汪季青詩稿序

波喧江浙綠遶千家山界常湖青連兩縣則有藍溪仙客
舊籍桐川黃海文豪新家顧渚尤耽詩賦雅事交游以余
近百里之間爲我命三秋之駕褰裳譙國只訪嵇康擔簳
陳留惟尋阮瑀然而雲時出岫鳥善離巢年年馮煖常聞
以彈鋏依人歲歲鄒陽不免以曳裾作客成都肆上未見
嚴遵洛陽城中絕無蘿季率爾題門以去適然擁櫟而還
猶復眷佇爲勞纏綿莫解瑤緘鄭重憑紅鯉以浮來錦字
分明倩綠鱗而送至齊紈乍疊披襟而謾謾多風秦鏡初
圓開篋而團團似月一搖綵扇便使身輕每鑑華銅頓憎
形穢向有詩扇明鏡之寄條初心之莫遂溝水東西俄舊雨之長垂
浮雲南北空糜好爵文園則引疾偏多徒點華班騎省則

閒居不少忽接山中之信獲披霞上之編按節狂歌臨風
卒讀夫其才調彌邁襟情更暢劉孝威林檎之啟字字英
奇張子布榦榴之章言言綺密五色膠東之紙錄此清文
千番巴蜀之箋書其麗句播之輦下足當騷雅之稱奔以
帳中不忝風流之目僕也一官落拓恨與年增三載羈栖
才因興減蒸思銷歇旣輸君十倍之才宦況聊蕭甘讓爾
五湖之長乃猶膏唇拭舌序王裴輞水之詩舐墨含毫弁
皮陸松陵之集多恐青獵獻誚將毋白鶴騰譏君縱忘言
僕猶知愧或者久要有在請待來年昔夢難忘遙申一語
竟獲右軍誓墓平子歸田紅簾白舫往來茗雪之間酒慢
茶檣滅沒鳬鷺之隊與君倡和定自成聲偕我流連差堪
作達謂余不信姑留息壤之盟於我何米收訂蒐蓋之約

戴無忝詩序

歷陽戴無忝者鵬砥名家雞碑妙裔文章清麗青霞紺雪
之辭體製遙淡白鳳蒼龍之筆魏郎弄戟之歲酷嗜風騷
黃童對日之年雅耽典籍南牙門地預簉英流西府人才
夙參華選加以地當軍馬俗尚戎旃山川崒嵒盡齊梁戰
鬪之場人物英多本淮泗風雲之氣七齡結納交塞外之
文鷺千里馳驅識中朝之擒虎黃皮作袴自許老兵絳祚
當胸偏呼健者無何入王相噬五帥不歸漢祀忽諸禍延
梁冀晉宗不祀釁兆張方年年代馬嘶風夜夜吳鈞蔽月
滄江淼淼誰家精衛之冤白晝漫漫何處杜鵑之哭虎牢
城上盡護諸軍熊耳山前爭提一旅時則王頰綺歲已作
流人李燮韶年翻成孤子賣珠乞活擊筑爲傭時鬻畚於

草中每弄丸於市上鳥生八九子非無帶血之雛猿叫兩
三聲大有斷腸之母何來女子猶識韓康除是友人或憐
豫讓爰乃永棄鄉關長辭婚宦廬江孔雀只愛單飛都尉
鴛鴦恒憎生別絲牽不斷半天荒地老之悲珠落難言總
去國離家之淚刀頭明月還照形容山上蘿蕪私悲手爪
若夫李膺乃景毅之師趙至與嵇康爲友江淹賦別能銷
世上之冤沈約懷人慣識夢中之路水名九曲卽是愁江
閣號千重皆成怨嶺瘴來似墨難聽蠻女之歌水盡連天
不看巴童之舞當年送別猶有白衣此日相逢可無紅豆
於是悲哀不少惆悵絕多夔伏聯篇則河北膠東之紙龍
蟠累牘則宋風謝月之文所謂辟惡時薰不蝕羽陵之蠹
龍蛇私守直通北望之樞也樊本衛吳之主愁近更屈下
之被放擊虞淪薄已罷觴歌東晉艱辛久蹶文筆屬擊汰
以將離遂吮毫而撰序吟成越弄依稀莊舄之哀曲奏楚
音髣髴鐘儀之調歸逢康樂行念陳琳

魏禹平詩序

滿城柳色笛聲已入陽關二月花朝天氣漸逢寒食屬文
通之賦別令敬禮以定文且盡餘杯爲譚往事竊述兩家
之舊德聊充四座之新聞昔在前朝正丁未季奄人竊柄
普天馳節甫之門元子委裘薄海拜聖媯之座時則余祖
少保公謗謗東朝君家忠節公稜稜左掖膺滂何罪同飛
告密之章喬固奚辜俱置同文之獄碧血長埋於牢戶丹
書深刻其姓名不其然乎彼一時也既而下官難息孤出
綰中北海冤消人還壁裏則有余父贈檢討公風度鴻騫
君叔庶常公儀觀鵠舉江深故國相逢石子岡頭花落空
宮並坐瓦官閣下而乃社猶竄鼠城尚憑狐華林半部多
是佃夫之伎人建業三更齊唱總持之艷曲於是筵畔徵

歌風前命酒張髯奮擲蓋寬饒醒後原狂耽手轟亟禰正
平怒而工罵宵人籍籍指爲鈞黨之子孫異類紛紛奉以
東林之衣鉢僕猶憶此君豈忘諸無何而鶻啼西誰昔夢
宵迷鶻出東周舊家晨散空留先澤鄙人則遠遜孔璋綽
有門風賢從則羣推交讓都緣世講欣聯袁灌之交頗怪
時流謬作曹劉之目間燕吳之異路偶出處之分途然而
故人知我寧來割席之言賤子懷人長記班荆之日是則
魏里之與荆溪交非一日而寒門之於貴族誼並千秋乃
者吾賢尤爲傑出詞壇獨霸跌宕於練裙紈扇之場文陣
雄激昂於鐵撥銀箏之隊從來才子必生孝筭之鄉自
古文人半產忠泉之里僕非阿好謝砌原開樹樹之花世
所同知王門定韞家家之玉僕也久從吳會坡異采之續
紛近在幽燕捧名篇之絳繹詎意灞橋草碧遙理歸裝何
圖韋曲花紅難牽別袂遂題數語爰集百端君其姑去送
子在綠波南浦之前僕亦遄歸俟我於黃葉西風之後

胡智修詩序

南朝金粉夙標綺麗之名北地燕支雅擅雕華之譽則有
沙堤妙胄畫省望郎裁碧艾以成衫纈紅桃而製綬人擦
玳管聯翩江鮑之才代典黃扉赫奕韋平之拜新居燕市
舊籍越城易水旣荆高慷慨之塲耶溪尤種蠡悲歌之地
談諧興劇攬帝京烟月之奇顧盼風生得霸國江山之氣
於是溫邢才調幼卽登朝王謝門風少而筮仕騎省薰香
之暇便事含毫倉曹傳粉之餘還思弄墨郎君官貴盈床
堆翡翠之箋公子才高繞架挿珊瑚之筆清辭不少麗句
偏多僕也十載清狂兩年羈宦白團扇上曾披柳惲之詩
金水橋頭乍識李邕之面屬同官爲傳語命賤子以定文
不端揄揚用承謹諉敢曰文如皇甫累君酬買字之縫庶

云病類相如爲我取忘憂之酒

方渭仁都門懷古詩序

若夫五陵南去地入中原三輔西來河衝北戒軍都蒼莽
金遼則處處斜陽碣石沉雄燕趙則年年蔓草一城木葉
霜未染以先紅萬里邊牆月既沉而愈白井上之燈忽紫
翦徹難逢市中之筑空豪慶卿安在於是金笳夜噭和以
曼聲鐵騎晨嘶雜之長嘯揮毫颯沓山廻故國之篇灑墨
淋漓火入荒陵之句人則嶽嵌而歷落俗原慷慨以悲歌
金飈蕭屑偏帶商聲秦缶高涼最含西氣嗟乎上客端憂
正奉倩傷神之後故人工病亦安仁悼婦之餘古今大矣
何須代往昔以興愁賢達紛如奚事向關河而寄慨君如
不樂請高吟蟋蟀之章僕尚能狂願緩進鷓鴣之杓

家子厚關中紀游詩序

潼關六扇擎出蓮花棧道千盤轟成箭括咸陽原冷百王之賸壘連雲蓋屋城空千古之殘碑蝕土星分井鬼陋吳越之輕輦地踞雍涼笑燕齊之迂怪千家板屋人多以擊缶相娛一曲車轔俗盡以彈箏爲業自戰國張儀而後競誇天府之雄至羸家成蟻而還都說關中之勝吳季札觀風而夏之審厥聲乎賈長沙弔古而過焉論其世耳然而地雖莽闊成敗偏多氣實高蒼興亡不少軼道乃降王之祖驪山爲竊國之魁邯鄲南走既從來惻愴之鄉灑涭東流亦自古嵌嵌之地閒愁疊疊紛於太華之旒歷劫綿綿多似櫟陽之韭千年綉嶺墮珥遺鉢一派溫泉殘脂棄粉雨淋蜀道偏愁阿犧之來月照鎬池獨惜祖龍之去遂使

長陵寶盃恒隨鸚鵡以宵啼徒令小市金箱每共確狐而
畫舞我之懷矣慎毋爲汎渭之行人卿欲愁乎何事作邪
岐之游子然而吾家南阮饒有才情昨歲西行偏多慷慨
三輔則宮中行樂之窟羅綺紛雜二陵則霸朝酣鬪之場
旛幢撞擊姚萇殿上一種斜陽赫連城前幾番蔓草銅琵
琶裂消磨異代之悲鐵撥沉雄淘洗前朝之恨字如柱大
揮毫而漫興猶顛墨似鴉粗擲筆而老狂欲旋嗟乎美人
鐘鼓阿房則昔事都非劍客弓刀曉闕則其人安在黃沙
浩浩空圍漢主離宮碧海茫茫長挂秦時明月是用倚駄
鞍而製恨和鈴柝以言哀隴禽解唱定翻成突厥之鹽秦
女如花須採入西京之記

門人陳集生影樹樓詩序

梁谿陳生幼遇艱難生遭孤露成童失怙已罷蓼莪羈貫
思親便悲風木那根矩傷心之語酸感旁人中山王聞樂
之辭哀纏行路況復門單戶冷外鮮朞功祚落宗衰內無
夢跡裝蘆作絮依稀閔子之愁刻木爲人髮鬚丁蘭之恨
出有燃箕之歎入逢鑠釜之傷懷惻何窮纏綿曷已然而
陳情令伯尚有白頭貲廡梁鴻猶無青案於是湛情述作
肆志纂搜文通好學漂麥寧妨翁子讀書負薪不輟大有
蘭臺之聚絕多梓澤之游時則銅樓清夜廁跡應徐金市
熙春方驅潘夏櫻桃初熟便騰詩句之清新荳蔻方垂夙
訏才思之警寤用鳩一集不亞千篇僕媿不文無能爲力
以余一日之長謬邀九品之評嗟乎同是孔璋之後裔豈

芝家風矧稱正則之門徒寧無流派莫以羈孤而廢箸勿
因隙弱以摧毫須知詞賦自有知音若說風騷原多定價
殷芸叱墨遘貧賤以奚嗟陸厥懷鉛沮讒疑而何恤羊叔
子不如銅雀伎雖有是言小家女嫁得汝南王詎無其日

老余江總勗爾侯芭

宮紫玄先生春雨草堂詩序

蓋聞嚴霜震葉寄跡何由滄海橫流客身無所志士抱羈
孤之戚貞臣興轉徙之嗟然而莊名白石猶有故侯家近
藍田非無舊將卯金劍去張平子以此歸田典午星移王
逸少於焉誓墓競說愚公之谷相傳處士之廬僕以客遊
時焉浪跡偶過海陵之郭獲登春雨之堂其堂也歷落嵯
峨嶒泓蕭瑟接天睥睨依稀潘岳之面城樸地闇闇髡髮
晏嬰之近市蘭橑夾峙望若鴛鴦複道中廻形如蟠螭文
廊基布綺館星羅珠簾共鶴露齊垂綉障與雁風同捲況
復關通南海雲水一區地號西湖烟波萬頃鳩鵠鳬鵠真
同鏡裏之裝蒲稗菰蔣不異空中之市王司州流連印渚
欣賞絕多謝太傅嘯傲剡溪襟情不少爰乃被以紫莖繚

之紅藥王家仲寶府種芙蓉陸君惠曉門栽楊柳文禽翔
於綠水翠羽拂於朱軒固已石留貞女之形寧徒果得隱
夫之號時則風吹鍛龕人是稽康月冷匡牀主稱向詡披
鹿裘而泮渙載鶴筆以婆娑手中塵尾皆過江支許之談
案上牛腰悉入洛機雲之作隱囊紗帽宛矣風流屐齒巾
箱翻其姿致若夫故都玉樹感不忘心舊事金盤悲難去
口聽關河之簞篋旣足嬰情見鄉國之旌旗奚堪拭滌心
如饑雀墮此空倉骨似飛龍落來藥店三年石闕豈無懊
惱之歌五夜彈棋大是不平之局時則憑檻悲歌登樓慷慨
王敦閣內惟多缺盡之壺陶疏齋頭祇有運來之甓於是東都好事南國名流並贈詩章咸投卷牘宋夙謝雪龍虎跳於行間何粉荀香珠玉生於字裏些踰趙壁光逾隋
珠崧構櫟庸材菰蘆下士當年龍虎差有姓名舊日射棚頗多儔侶訪羅含之宅幸覲斯堂卿山簡之杯乃爲茲序所喜虬鸞在後悉高山流水之音深慚糠粃當前媿白雪陽阿之曲言歸二酉兼慰雙丁

歸田倡和詩序

貝丘畢載積先生青社名家烏衣巨閥系傳姬籛宗倍亢
於毛卿姓著齊封族更華於高國若乃綠碑突兀秦丞相
所以登封朱邸崔巍王文考於焉作賦三千技擊水朝百
國之王十二諸侯地扼中原之吭青州國勢首重淄川天
上星精尤推畢宿江東顧陸隴右崔韋聯茵則綉幙齊褰
列宅則戟門對啟大兄康樂晨遊朱雀之門小弟清河暮
宿蒼龍之闕竇長君意氣名冠東京桓元子風流姻連北
闕然而井湧忠泉庭生孝笋于公子第衆盡識其高門石
氏家風無不稱爲長者陸機舊德祇事詩書顏峻清規不
談權要洎乎大司農白陽先生出珥貂蟬入升鼎鉉班資
並茂蕭相國之元功品地逾崇宋尚書之素望於是瑞協

孺之先榮司農公三子先生其第二也先生幼卽明通長而岐嶷麒麟爲目果天上之佳兒鸚鵡成篇信人間之才子無何甫號勝衣便逢多難纔離毀齒游歷百憂當我先生拜袞之年卽令府君騎箕之歲斯時也伯起預亡少孤尚幼先生隻身卹緯中夜茹荼弱必致哀貧能備禮西園賜鑑置守塚之干家北府爲塋給餽歌之十部傾都以送相此歌虞達墓而觀憐其嘔血至夫武安見釐博陸相傾安釐母弟懼兵革之飄離田單宗人痛鄉廬之轉播先生閱歷故未易覩縷述也旣而策名闕下受爵朝端綰組高梁卓異推於朝議牽絲絳縣清白洽夫輿情尋以新恩遷之令秩原夫崇川之城郭也者雄關氣抱旣歲久而輒傾

天塹新開又時移而潮囁先生篩此千秋勞其版築星言而出參佐陪庭亮之牀露坐以臨城角奏劉琨之笛千尋雉堞寧勞下瀨戈船百里金甌詎事征南戰艦軍則已名君子城應祇號呂公又崇川之土地也者民鮮奇羸田多斥鹵六月誌大雨雹百里書無黍禾甚而家亡戶絕鬼類夏畦抑且岸坼沙坍人同魚鱉公酒血上書單車入告叩閭有路願除已去之丁竊祿何情冀緩難供之餉兩年惠政人思以賈姓名兒一郡仁聲衆共曰杜公吾母詎民命之不猶值君門之甚阻謗生一篋誰明良吏之冤釀起二桃孰辨遠臣之枉先生乃失馬不驚掇蜂無懼珠生字裏淮南招隱之篇霞蔚行間平子歸田之賦傳之官閣播此通衢凡茲食息之倫疇忘生成之感或鄴都耆宿素蒙鮑

叔之知或吳國英年久動恭豈之嘆或金閨貴客手題慕
德之碑或石戶逸民口誦卿恩之作或金張許史之姓庇
宇車前或東西南北之人擔簷閣下甚至談風論月休上
人之才情秀虎描鸞曹大家之述作人爲四咏緒有百端
某以菲才辱公降遇珠枯蒼海久無照乘之期玉碎崑岡
永斷賞城之望幸高軒之不棄乃下士之俱收爰於茲集
之成重命鄙人爲序裘稱狐腋慚茲麻枲爲緣琴號龍唇
媿以柷圉作倡敢誇流水用景高山

陳迦陵儻體文集卷六

宜興陳維崧其年譔

長洲宋實穎既庭

選

維岳緯雲

弟宗石子萬

叅閱

江都吳綺園次

男履端

姪伊

序

周櫟園先生尺牘新鈔序

粵稽書名六庫類有千端苑稱七畧義非一族纂華林之
丹槧文體彌新綜玄圃之綵緗才鋒逾整謠歌騷賦據壯
采於篇章頌表箴銘運英裁於述作傷往則旨深於哀諫
切今則議蔚於論策以暨九章七啟靡非才子之流洎乎

賓戲客難大有風人之致語其變態巧曆不能窺測其繁思哲匠莫能算今之尺牘蓋其一也彼夫體製可得言焉若乃屢及齊郊柝聞邾邑荀瑩不返先軫難歸既轍亂以旗靡復主憂而臣辱楚昭多難悲三戶之纍臣許穆無援痛阿丘之弱女臨關歎息願登子反之牀叩壘躡躇冀射魯連之矢事當呼吸磨盾以書變在須臾繩城而下亦有疏勒流官燉煌降將蕭綜北去憐廟社以何依符朗南奔聖鄉園而不見朱鶩路遠覓消蠻海之旌旗白馬營空腸斷瘴江之鉅鼓訣美人與愛子贈明鏡與金環子卿足下疇昔可知伯之君侯生平已矣若乃賤臣邁謗庶女蒙冤江淹乃善恨之人馮衍亦多愁之客三年獲譴永無造請之期盡室遭俘長寵歡娛之日母兮天只臣不如人恩刺

血以陳情念上書而訟枉又有密親暫隔慙友長離感時物以流思對景光而結想尹班契闊可無知已之言樂衛睽違寧乏相思之句叙苦辛於一介寄輾轉於數行宛矣瓊函居然蘭訊更有紅粉樓頭青牛帳裏君居塞北妾住江南攀桃李以悲來顧綺羅而泣下吹簫公主轉雅怨於朱唇織錦姬人論私情於纖手凡斯之類皆藉於書時則北路名流南朝文士阮元瑜之書記久已流傳蕭大園之尺牘益爲膾炙爰乃襞此赫蹏命茲側理膠東河北並馳五色之箋大令中郎互競連珠之格爾其爲體也或磊落以見才或嵯峨以植旨或首尾以溫麗或綈構之縝密或文辭簡要情片語而已該或思理淹通氣百函而彌厲或臨池詳慎細蟠楮裡之蠅或握管飛騰橫跳天門之虎鏗

鏘可聽塗山之玉帛萬重藻績堪觀赤城之雲霞十丈入劉家之世說卽是蘭茗登蕭氏之高齋無非琬琰輓近以還此風不嗣原其流弊厥有三端顧陸華宗潘楊妙族金貂翠珥聖若神仙坐褥隱囊便爲卿相寒暄筆札都由呂覽之門生故舊書箋盡出桓溫之幕客且也貴僚雍雅惟傳論性之篇華札翩反爭諱言情之牘其有擬繁欽應璩之書效邢邵崔㥄之札者呵爲小子目以外篇其所爲難一也且夫燕函越鎭各有便安秋奕僚尤悉由熟習鯁純自麗不懼北轍之夫狐毳雖溫難悅南轍之客今者單門寒畯縫掖素流祇工制舉之書但慕集賢之院卽使才同孝穆文類子山無益身名徒資溫謨加之遭逢跼蹐罕西園北府之遊徒侶參寥之華屋染池之菴事蹟不足以供

鋪叙爵里不足以寄選擇其所爲難二也古者飛書馳檄盡簉戎旃記室軍諮雅多才俊兩軍相遇必以辭令爲長一使相將尤以語言爲尚今則三臺大帥九姓名王行人無僑札之才僨介缺向嬰之輦紇庫干自署不識姓名曹景宗作歌難諧兢病一時風會殆何如乎下至閨襜又可知矣其所爲難三也然而星移代換何世無賢璧坐璣馳孰云非寶此新都夫子旣顏麗製以清裁櫟下先生復選鴻文於賴古矣嗟夫曩遊不再自古爲悲後聚難期於今所歎匪勞音驛莫慰幽憂不事箋繪奚通繢綻遂乃領諸家之秀采薰以名香錄百氏之芳華裝之異錦寄來黃大半漆書竹簡之古文損罷文鱗悉篋衍巾箱之脞錄副諸記室掌以典籤

吳園次林蕙堂全集序

山名唐貢峯接道塲水號洮湖波通上若吳雲入越家家以茶笋爲生魯析聞邾處處繞烟波成市惟彼常湖兩郡夙稱唇齒之邦曾聞召杜名賢出作吳興之守其人也畫省望郎金闈貴客鵠爐螭舫推詩酒之總持舞扇歌裙擅湖山之宗主時則秦川公子爭願依劉西鄂文人咸思御李白蘋洲上依稀通德高門碧浪湖頭鬢鬟華陰上市銅蠡夜滴尚簇鱗衫鐵鳳晨關便翻鶴蓋三明七穆橐鏤管以俱來兩到雙丁捧敦槃而狎至獨有鄙人況居旁邑調絃待奏情含流水之中滅刺難前客在亂山之外梅村贈吳興詩有客比亂山多之句惟衆客實嗤其拙乃先生正賞其愚既而陶潛解組仍住潯陽梅福抽簪偶來吳市乃於失職之辰猥有

下交之雅殷勤訪戴流連杵臼之間忼慊推袁跋扈風雲之氣時則鄙人方嬰痼疾屬江花之就落甫邁鐘期當潘鬚之將凋方逢鮑叔嗟乎文舉何人子卿足下干戈載道偏乘單舸以遄來闊闊交衢獨造寒門而徑去君非有爲僕豈無心自此游從彌淹歲月東吳麋鹿美人羅綺之塲南內鷗鵠霸主繁華之窟以及寒梅縞夜漣菊叢秋藏釣賭酒之塲刻燭分題之會觴餘舞蕉紅燭薰天奕罷橫刀赭羅颯地先生莫不踔躍此間賤子亦復激昂其末一日者水國斜陽坐客半更衣而起高臺古樹羣公皆載酒而從君顧挽余吾其語汝昔者結繩而降代有篇章兩栗以還人多撰述自俗學之師心致前型之偭矩原其流失厥有一端乾庫干運筆成雖斛律金譽名類屋宇儒老子高

談內則歸藏未學小生粗識孝經論語上車不落便尊唐宋而薄周秦體中何如輒譽開元而卑大曆是則胸無故實苟鮮縹緗裸民謂霧縠爲太華贍女憎西施之巧笑此其爲弊一也或則僅解蟲鏽差工獫祭悔讀南華之卷不精爾雅之篇倣蘭成碑版之作祇堪借面弔喪倣醴陵離別之言僅可送人作郡不知六詩三筆每每以古鬱稱奇四庫五車往往以沉雄入妙徒組紜笙簧之是侈將風雲月露其奚爲是則刻雲端之木雁未必能飛琢箭上之金徒何曾解舞成都粉水弱錦濯而寧鮮河北花箋鈍筆描而夫麗益成擣擣劣得揣摩此其爲弊二也以茲二弊足繢百家今吾詎有是乎惟子知其免矣且夫韓起雙環俱蟠龍雀干將兩劍並截蛟犀輿沿古以迄今羌無奇而不

耦是故珊瑚筆格互說庾徐翡翠書床交推溫李晋家潘
陸梁代陰何南朝則江鮑齊名北府亦溫邢競爽歌樓麗
句元白同聲酒舍香詞周秦繼響昔人所載何代無賢當
斯世而有吾兩人也寧集成而無子一言乎僕愧其情懼
違所請屢趣未應旣負諾以逾年擬作難工復含毫而彌
日屬當諷諭之再三爰誌榆揚之萬一爲魏公藏拙數行
敢云金玉之投惟惠子知余異日亦望瓊瑤之報

三芝之集序

廣陵吳園次先生天上謫仙人間傲吏一麾出守爲風月
之主人獨往名亭作烟霞之總管研屨於滄浪亭北賃廡
於臨頓橋西衡門則羅雀雙扉都無雜客珊瑚則雕龍百
幅悉付佳郎於是家擅鳳毛人誇犀角劉氏則孝綽孝儀
之外益以孝威王門則僧虔僧辨之餘加之僧孺人矜五
寶較燕山已獲其三俗艷雙丁筭鄰下尚輸其一允矣德
門之盛事洵哉藝苑之美談爾其黛管霏花彩毫爛錦夙
鍾慧業生天原與貝葉爲緣產兆奇徵墮地皆以芝蘭作
字當年崔珏名是鴛鴦此日魏收體高蝴蝶固已青牛帳
裡聯篇芳藥之花寧徒朱鳥窗前滿篋葡萄之樹若乃囊
訴錢空床嗟金盡張平子歸田以後陶淵明解組而來償

井公之博進負滿十千貸營室之聘錢逋踰百萬入室有詬租之吏當軒聞戛金之聲時則閒坐鯉庭狂呼驥子紙還對勞携兒登避債之臺韵可分闔掉臂入忘憂之館千杯競勸扶一老之頰唐百韻爭飛沸兩親之譁笑行間織錦大有萊衣懷裏援珠無非陸橘更或鶯迫人啼花催酒熟一帆乍返三徑纔晴杜門却輓跌宕於孺人愛子之間席地幕天徜徉於麗日和風之候藏釣甫罷葵紅蠟以攤書度曲將終倚綠籌而隸事抽五花之寶簾長幼爭梨掣十樣之蠻箋弟兄奪棗老子顧之而極樂若翁見此以逾歡又若總角迎賓勝衣揖客東都有道雲霞意氣之交南國人倫玉帛衣裳之會逢孟嘉於末座識楊修於早年莫不珠玉爲心蛟螭在乎玉簫始奏已綺光機女之房銅鉢方慶便畫滿旗亭之壁香詞麗製約近千篇玉軸牙籤都爲一集命小胥而繕寫託副墨以流傳嗟乎我辰安在筭口難開生世不諧憂心曷極棋上有不平之局酒邊多惱懊之歌寄語尊公何勞永歎弄紅珠於掌上舍斯無取樂之方玩翠羽於堂前卽此是消愁之物

續臞菴集序

震澤湖邊舊餽波澤垂虹亭畔尤足林塘筆床茶竈陸天
隨汎宅之鄉雨簷烟蓑范少伯浮家之地爰有高人於焉
小築聯就吟詩之社宛爾漫郎行逢選佛之場居然乞士
才踰王粲詎屑依人貧甚茅容偏能養母奉慈闡而出世
擇隙地以逃虛衡門蕭寂不打慈鴉修竹檀樂惟生孝筭
蓋松之今日所居卽宋王君份臞菴故址也昔君以吳地
萃宗楚天清尹咏桃花流水之句解組遄歸卜浮天釣雪
之區投簪終老烟汀月嶼秀極人間竹屋花潭甲於天下
於是雲山綿邈大可清談風月輕妍時逢勝友水明樓榭
每留鬪奕之賓檠暗簾櫳慣隱啞杯之客或揮毫而作賦
長把袂以臨風此一時也何其樂乎旣而鹿走吳中鶲啼

洛下兩宮大去五帥無歸民間池館淒同趙宋之江山園
內琴尊寂若臨安之歌舞凡此寒烟落照之縱橫非無秀
戶綺窗之髡鬚鳥栖月下已換樓臺燕到春餘半迷門巷
過客有看花之恨行人多折柳之悲然而昔夢猶存其人
如在竹林已盡還傳阮籍之廬香草無多尚說屈原之宅
恨古人之不見知來者之爲誰能無思舊之銘用當懷賢
之作僕與松之交非一日居雖異縣難忘者城北徐公生
幸同名差別者小冠子夏五湖在望碧鱸紅豆之莊百歲
非遙白髮黃雞之曲君如不達前歡已屬乎爽鳩僕尚能
來異日寧虞其題鳳

胡黃門其章先生黎錦堂集序

古者青瑣尚格人之訓箕範哲謀黃扉弘國老之規臯謨
溫塞納約自牖義本坤乾辰告遠猶風傳比興誼關密勿
旨必繫於君王慮切風愆言必歸於忠愛並揚萃於紫極
胥騰譽於黃中婁東胡其章先生姿制清剛風裁英整早
年挾策名動公卿壯歲彈冠任膺民社溫侍讀淹長都雅
物望所歸薛司隸博洽嫋萃藝林所服屬有明之末葉乃
思廟之當陽東朝之水火方平北寺之玄黃未息中常張
讓大有責言外戚何苗絕無成算況復三臺柱石悉夷甫
之風流列鎮旌麾盡深源之方畧南風不競楚幕多烏雪
壓賀蘭傳介子之功名蕭瑟天低汎隴呂婆樓之才調縱
橫旣海水之羣飛亦崑岡之失火時則先生晉秩中朝冠

班左掖潘安仁晉家騎省珥挿華貂沈初明梁殿侍中衣薰寶麝硜硜以對棣棣而談於是署有梨花望觚稜而封駁垣多薇樹對鹵簿以敷牋絕多沈約之彈文詎乏鮑宣之封事森森白筆無不批根赫赫青蒲因而折角洎乎離亂已賦遂初沿及滄桑彌耽招隱王右軍晚年肥遜誓墓尤堅謝康樂暮歲棲遲游山甚劇於是漁畋藝苑鼓吹詞壇倣終軍奇木之篇倣充國金城之奏莫不書成雜俎經號歸藏繩繩千言洋洋百卷然而庾開府之集五存五亡杜征西之碑一山一谷間多流軼或有遺亡今茲所存如斯而已崧以春中獲游珂里三吳草長訪張嶸之名園二月花飛過王珣之別業猥荷先生命爲茲序彦升撰王公之集珍爲國華伯喈譽衡之書私爲帳秘深慚糠粃何

當瓊瑤

黃雲孫詩古文函青集序

原夫書契以後文質相沿結繩而降丹槧互盛莫不濬發芳馨符爲述作陶鎔性始寄之篇章揆其命意並祖六經稽此流風遂名四部是則藝林奉爲藻績文府稟爲楷模矣吾友雲孫玄圃名流玉杯才子吳文學之別體早著江南王司徒之燕歌廣傳河北衣薰丹棗魏馬驚香面傳凝脂春車贈菓兼以性愛風騷情耽撰製張融之姿制獨絕人間徐陵之穎惠夙來天上辛壬新製遍屬華繪甲乙囊函偏親翠匣種葡萄之樹玩此清文贈石榴之花矜其麗句固已洛陽紙貴寫此名文河間錢數買其秘本何圖海嶽遽爾翻飛屬有蛟龍因之沉頓玄武湖中明珠焚六十之灰甘泉宮裏珊瑚碎一叢之樹泣白衣於前殿公主傷

心覓紅粉於高樓王孫下涕則有娼家蕩婦輕衫乍單青
樓幼女織蛾徐落陸平原之入洛聲調俱悲王長史之登
山音情益絕焉能銀爭墮雁不寫愁懷瑤柱辭蟬罷彈別
怨斯又子山別集半在北周之朝仲宣佳賦大抵南荆之
作矣於是綺席贈酬錦衾唱咏簡棲頭陀之碑玄晏三都
之序盧劉還往託青鳥以傳言蕭沈纏綿開朱邸而著論
風雲不斷吟咀遂多消此三餘都爲一卷時有北里鳴鞭
之客西京挾彈之夫金張許霍之家王謝顧陸之族朱甍
初耀歌殘鸚鵡之杯華廊始敷舞侑鳳凰之曲靡不良宵
三五斗酒十千若夫蠻蠻邊上疏勒城中過薛下之高臺
問鄴中之故館李陵答別誼重鶯鶯繁欽定情恩深
璫其思致宛矣風人嗟乎妾家淄古君返河陽銅街麗人

擲簾前之梔子珠屏才女投盆底之丁香徐淑多情扇
嘉於匹婦陸雲有作表嬪媚於新婚銀筐以紅桂爲釣瓊
窗以翠椒爲室不乏緣情之什豈無累德之篇自非太上
之流忘情之輩庶幾茱萸作曲代彼胡香芍藥爲篇蠲茲
靈藥者乎顧謂維崧爾宜爲序維時三江花落五嶺鶯飛
陌上鬟飄傷心獨嘆帳中麝冷入夢私憐然而人丁羈旅
運值參差聊爲繁縟之詞靡益牢愁之致知不足以序香
奩選玉臺也

方素伯集序

粵自結繩而降漸啟文明書契以還代傳謨誥孤桐浮磬
律既審於后夔黃竹白雲韵復釐於穆滿卯金當璧並熾
才華典午膺圖彌耽風藻大同天監益去兩京之遺元和
景龍猶仍六季之習凡茲鉛槧悉稔吟謠不預斯流何名
才子譬之枇杷盧橘無非上苑所充霧縠冰紈皆是後宮
所御高陽殿內小侯之玳瑁千重金谷園中都尉之珊瑚
十丈作昭明之學士尚有高齋入記室之詩評已多上品
東南孔雀句裡皆金西北浮雲行間盡玉腕桐方素伯者
金龜壓鈕代有要人黃雀投鑛世留陰德陸士衡之祖父
累躋台司劉孝綽之高曾夙登鼎鉉若乃少卽清通幼而
岐嶷徐孝穆綺才第一睛訢其青王威明妙譽無雙胞傳

其紫童年揖客解對楊梅暇日揮毫能題芍藥命不猶人
生逢多難楊家德祖庾氏子山一則丁炎祚之將傾一則
值蕭家之既殄關東蛾賊白馬如風河北鶻兒青袍似草
辰傾岳圯宋微子有麥秀之歌國破家亡周大夫有黍離
之歎時則尊府君密之先生義激兵欄忠騰甲庫攀車痛
哭誼切王琨撫狄沾衿情均索靖無何晉宗馬渡不用王
導之言齊埭雞鳴惟任褚淵之輩先生旣間關宵遁素伯
亦襁褓南奔亡命蠻邦避仇嶺表猿啼灘水夜夜迴腸雁
阻衡陽朝朝掩涕魏安釐之母第質邯鄲而不歸庾肩吾
之愛千里江東而難返地名海角人是客兒時則素伯雖
質亞生知而年猶未學迨乎王琳失路事去南梁鄧艾縋
兵運移西蜀廬江何亂遂返鄉園與興沈炯言於京國年

當毀齒雅肴饌乎百家時甫勝衣已笙簧乎六籍齊諧諾
臯之志無不流連馬蹄秋水之篇咸歸披覽珠生合浦便
多結綠之名劍出豐城還擅干將之號張正見冠世才情
五言尤善左太冲軼羣筆札三賦尤工何殊翡翠之牀不
異碑碣之椀然而情深君父齋種白楊身歷興衰曲多紅
豆蕭大圓書牘頗聞辛惋居多劉越石詩章惟以悲涼爲
主況復文武道衰衣冠數盡徐陵旣老誰說華宗李廣不
封疇憐故將十齡公子賣袖裡之紅珠七世王孫露腰間
之寶玦借來秘本悉皆市上之書鑒得微光不過隣家之
火於是反袂以歌臨文而歎陳思王之上表臣獨何人陶
泉明之自祭將爲異物吳歌魯酒詎足忘憂漢艷楚騷差
堪破渴僕與諸方交惟兩世誦謝家之妙製尤喜阿連逢

何氏之佳兒絕憐第五用爲茲序聊申膠漆之歡畧寄斯懷豈待鱗鴻之請

董得仲集序

聞之入王君夫之厨者魚腊非珍賈杜弘治之客者閭娵非美張帝子之樂而眩師罔敢逞其奇彈寡女之絲而曼延靡所矜其巧雲間董得仲者顧陸名家阮稽逸侶遙遙華胄史旣名狐燁燁詞宗毛還稱鳳生值太平之日地當吳會之衝勝友如雲清言何綺花飛南陌誰家宋玉之釵鶯囀西城何處陳遵之轄於是體如楊柳目以佳人手執松枝推爲都講倡家寶瑟時過皂莢之園戚里銀箏獨卧芙蓉之府班雖小市容彼荒澘鸚鵡長廊恣其歡謔俄焉人哭秦庭鬼謀曹社杞侯不復郿子無歸羌廊處以長愁荃聞居今不樂玉顏已變何心華屋之遊金竈難傳息意神仙之術徇烟霞而不返結泉石以終身蓋李都尉之途

窮箭盡事業可知亦向子期之人去鑪存生平已矣既而
劍合無期河清難俟仰嗟時命遂溷跡於秦關俯恤田園
聊勉餐夫周粟劉越石化爲繞指悲不自勝曹子桓身作
轉蓬泣將何及爰乃燃脂暝寫雜擬百家弄墨晨書廣搜
七畧薔薇承蓋髮鬚萬年公主之詞桂樹扶輪依稀西鄂
王孫之作彙爲別集藏彼名山屬於建業之城闔獲誦膠
東之著述吟謠靡已披賞極多嗟乎俗忌孤芳世疵文雅
經傳蒙吏庾子嵩譏爲了不異人賦鍊左思陸士衡詣以
此間倉父才高司馬遇楊意以何年博甚子雲遘桓譚而
奚日行矣董君勉旃自愛不遇知音之輩且食蛤蜊倘逢
識曲之人定呼龍鳳

吳天章蓮洋集序

今使酒酣以往設爲鄒陽宋玉之大言金盡之時繆作徐
福變巴之謾語遂已室有園廛家餘井碓牛衣馬磨僅足
相容雁稅魚租粗能自給碧畦半畝便爲庾信之園素壠
一區卽是潘尼之館蘋繁弱蔓花是恒春紺裯柔柯藥名
半夏繞逕植繁欵之蕙隔籬栽馮衍之薑閒居徐邈尚有
酒鑑暇日陰鏗非無舜銚則鑿坯而遁雖顧領其何傷帶
索而歌但寂寥其奚悔而乃東都公子歲歲依人西鄂詞
流年年失職果蓏羸蛤都無俯仰之資廬舍陂池總乏栖
遲之所寂寂梁家之竈蕭蕭卓氏之爐擬獻賦而未能縱
著書其何益并公善博索笑奚來韓子能文送窮不去於
是轉徙燕齊崎嶇梁趙鬚如蝟磔只欲橫鞭弩作鶻張偏

思縛袴所過碣磯古戍役衲空壕連臺北盡從來蠻鬪
之塲禿髮城南半昔日狐鳴之地鶻花似血營前之簾幕
何多班竹如啼帳後之琵琶不少窮魚茹怨凍雀銜悲紫
臺無暫返之賓白社有難歸之客然而才性英奇辭鋒卓
犖盾邊磨墨彌工變徵之聲驛裏題詩大有陽春之調車
前騶卒偕飲酒以何妨塞下荒倉共彈箏而亦可千篇揮
纏同天馬之摩空萬象淋漓類巴船之出峽楊雄譽屹雅
擅攤經梁肅重胆尤精製賦此蓮洋吳子相傳七發之篇
而笠澤陳生爲作三都之序也嗟乎兩戒河山二陵風雨
上黨實九州之脊河中爲四塞之雄鴉兒峪口美人與駿
馬安歸鶴雀樓前廢寢共荒陵奚在行山日紫憶百戰之
旌旛汾水波紅想三秋之簫鼓空尋斷碣祇剔殘碑所歎

吾賢復生斯地頗傳殿上競誇才子之名莫便山中願息
高人之駕

陸懸圃文集序

將使江蕭染翰弁龍門紀事之文潘左操觚序鹿洞談經之作則筵前授簡請以屬之他人座上揮毫願以俟夫君子何則燕函粵鎔遙有耑家北轍南轍要難並詣一疏一密既意滿而靡宣或質或文復情睽而罕儻然而諸家立說趣本同歸百氏修辭理惟一致倘毫枯而腕劣則散行徒增闕冗之譏苟骨騰而肉飛則儻體詎乏經奇之譽原非涇渭詎類元黃先生姓陸氏名廷掄字懸圃揚之興化人也淮海逸民天山遯客周燧之結廬岡畔髫簪知廉王丹之載酒田間鄉間致敬尤耽墳籍雅嗜綵緝高文通庭中維誦雖漂麥以奚傷朱翁子道上謳吟縱負薪而自若博聞強記說經傳嶽嶽之名起例發凡談史得觥觥之號

然而夙嬰板蕩蚤會仳離炎精乍燼普天興銅馬之妖姬
籲將遷出地兆蒼鵠之釁先生則土室繩床何知蛇鬪楮
冠葛屨不驗狐祥推其芒角甘埋照以終年息彼機橦搥
達生而用老既而興朝當璧誼辟承乾六千來伯越之人
八百有歸周之國而君也敢離隱豹竊比伏鸞江流涪萬
錦因屢濯而逾鮮火熖崑岡玉以遭焚而倍潔不改衡茅
之業依然山澤之游於是縱橫六藝樂踰南面之榮貫串
諸家氣歷萬夫而上兔園半冊篆竹素以蟬紅馬磨三間
翳蓬蒿而薈紫左太冲作賦筆札堆藩溷之間張壯武屬
文史籍載車箱之內郝隆書在腹經曠後以偏多楊子經
成詭縱覆焉而不盡芸籤壓架知爲曹氏之倉玉軸連雲
識是杜家之庫爾其枯朽怪石貌以醜而能奇瘦竹蒼藤

勢以危而得秀么絃急拍峽中無不叫之猿落水荒江樹
上有長飛之鵠兩山東處不忘擎攫之心獨澗停時尚作
潺湲之想鷹雖就鑑以思飛虎至攀牢而必怒郭翁伯形
容眇小居然間里之雄嵇叔夜狀貌傀俄信是仙靈之器
更有粘天盪日洋洋辨道之篇裂石崩沙傑傑哀時之論
發皇萬態風雷躍踔於行間籠罩千秋袞鉞砰鏘於字裏
龍馬抉三才之奧綠水浮來龜蛇蟠八陣之圖丹弧射下
手柔弓燥據鞍爲勑勒之歌腦滿腸肥斫陣作普黎之曲
懾張垓下楚漢之卒皆驚劍出室中晉鄭之頭畢白洵哉
墨海之洪濤展矣文峯之鉅嶽矣慨斯世之高文有寧都
之魏叔狹因品隲之次沿及鄙人獨於駢偶之家謬推蕪
製君也書淫亦爲痴嗜昔者吳陵握手殊感豫州知我之

言茲焉燕市郵書頻叨散禮定文之託成言已久食之慮涉於肥宿諾難逋頭也懼來其責因其誣謬用以揄揚敢曰韓非之附老子傳還私幸其同亦云江神之見秦皇貌則自嫌其寢云爾

宋楚鴻文集序

五茸崎麗代產文人九辨纏綿世生才子客來南國相傳金粉之篇居本東隣大有玉釵之句何況肩吾父子遙擅雕華孝綽弟兄俱稱麗則論家風於河北此是崔盧叙門地於江東斯真顧陸者哉我友楚鴻當年舞象葡萄滿篋譽便起夫通都芍藥盈箱名早傳於綺歲偏工綺密寧患才多妙解瀾翻惟愁紙盡固已安仁縣裏千枝皆桃李之花衛尉園中七尺悉珊瑚之樹洎乎運值家屯時丁世梗紅顏公子彌深彈鋏之嗟綵筆文人祇切碎琴之感劍以不平而慣繡竹因有恨而恒斑是則崔駰罕樂頗多憔悴之言馮衍眇歡不乏愴愀之致情區哀樂境異平陂覽吾友之生平增達人之歎息矣僕與高門久叨密契記託紀

羣之雅實惟壬癸之交爰以薄游言過上郡吳王射雉之苑詼笑彌旬陸機唳鶴之城游從浹月尊公愛客開綠野以盤旋賢從憐才飛錦箋而贈答楚鴻十歲脫帽而爲促搦之歌漢鷺七齡揮毫而作肇窠之字曾幾何時此歡不再王安期洛濱之戲大類前生嵇叔夜竹林之游真同昨日花飛鉗笛已無摩笛之人草沒雕闌并少憑闌之客思君千里別子十年更披燕市之新編益觸吳天之昔夢旣百端之交集且一語以相寬須知書成呂覽定懸市上之金誰云璞獻荆王長韞櫝中之玉

陸麗京文集序

緬夫結繩以降推輅以還五色相宜八音代叶是以關雎洋洋師摯以之愉耳姬文郁郁宣尼於焉美心固知典謨爻彖之篇雅頌國風之作鮮不儻茲堂闕均此川涂已每嘆時賢動相猜二謂夫懷來貞亮之輩蘊情愿慤之徒便宜俠烈鳴高玄風獨上何圖騁此菁英耽夫微末耶嗟乎是殆溺蕡桴之音而毀咸莖爲不足陳悅齶齒之容而詆巧笑爲不足錄也吾友陸子麗京神簡擬安豐姿制似無奕家世忠孝才辨贍給徒以會風人之末流悼靈途之綿邈煩紜緯繕脅亂潰惑卽其著爲漏卮有所述作大非折楊皇萼之音焉意蓋閔時疾俗澤於溫潤之義思諷諭以自靖故思或不自得有所假托以明志也且夫讀書慕儀

有年矣其志潔其物芳而身尚廁於井臼醫卜雜伎爲世穢賤士生斯世奚畧無所短長也竊惟曩昔建安才子太康名士其人或陳留之華胄或秦川之貴游而夙嬰愴悅終見摧阻傾輿糜爛灰釁斯酷不獲已而寄之文章然其纏綿懇款之意可以觀矣夫過類凱風遇如塘上激情怨誹君子猶將白之矧乃事在宗國禍鍾君父大夫悲其忝離狡童傷夫麥秀當塗愍其不競永嘉刺其反而而顧矯情澹泊靡所言說則是寃同殄滅而視若關兮屬繫同生而怒如揮手斯固行已類於飛沉志無關於忠厚矣僕瀏覽陸子諸製言雖有寓論必有脊批杷盧橘辭匪涉於浮夸百一疾邪氣無傷於婞直此與誼夫寧大離異小儒不察呵爲蠟履良足怪耳僕年齒壯盛智術蕪落有越石繞指之譏抱顏遠貧賤之嘵麗京弘我以鴻藻開我以駢烈我思古人此意良厚間者羈旅憐怛百卉俱腓四節悲涼適與事會撰序至此沾臉彌襟又何遽以文舉之知劉備玄晏之序左思用加標榜巧爲緣借也

謝別駕景韓醉白堂集序

清湘景韓謝公里近爐峰家隣溢浦音辭清拔才長紅藥
之篇閥閱通華族本烏衣之巷豫章實杞梓楩楠之地洪
都皆鐘鳴鼎食之家戶有分符奕奕藩房之參佐門多釋
褐翩翩京室之公卿然而樹合檳榔仍爲桑梓派分瀛水
卽是淵源康樂後人亦擅客兒之號張衡愁士頗工桂樹
之思旣占籍於尉陀臺前乃策名於伏波柱上無何而漢
委珠囊秦亡金鏡李花河北知楊氏之將衰玉樹江東稔
陳朝之不競公乃委身上國托命本朝跋蹤投秦衆說由
余之志間關奔晉人稱椒舉之才未歲鐫龜旣專蠡邑戌
春剖虎仍佐蘭陵則有枹鼓稀鳴賊曹罷警綵衣巡徼只
逐金丸白石圜扉但生綠草銅甌有亭平之嘆棘林多明

恕之謠呂虔贈刀之日屢染數章于公決獄之餘更成一
卷時則徐陵去國沈炯思鄉戴媯嬰大去之愁許女抱不
歸之恨聽曲中之红豆此是鄉關盼天上之金輿誰爲家
國驚魂曷極捐胆奚言矧乃一裂荷裳生平頓盡再焚芰
製疇昔俱哀絃風月以悲來溯琴樽而涕下丘遲書內非
無愛妾之堪思石崇引中大有名園之可念中山聞樂之
對悽愴可知洗馬渡江之年歡娛已矣況復門風樂托夙
傳謝萬之狂禮法清踐世目稽康之嬾性難牽夫案牘興
屢溺於篇章張敞居官不乏畫眉之日陶潛出宰絕多飲
酒之期弗籍吟謠奚由陶放匪工措撰寧畔牢愁於是芳
藥名篇櫻桃作曲甘泉宮裏長六寸之明珠芳樂園中開
十重之青瑣人如徐勉偏工風月之談才比張華詎短其

雄之氣須知傳世自遇君山若欲定文豈煩敬禮猗歟銀
筆變彼金樓

太史五叔祖集唐序

蓋聞潘安仁之文筆始述家風陸士衡之詞賦先陳世德
是知源由控鶴不無華胄之言裔出濯龍亦有高門之語
況吾陳氏世有傳人咸自胡公分爲聖族粵建康之不競
屬趙宋之遷都始自汴梁居於陽羨忠泉出井衆云君子
之鄉孝笋生庭共識仁人之宅遙遙甲第羣籞皇華奕奕
輜輶俱叨湯沐金魚紺袋班銀青光祿之階赤棒華騶極
牧伯諸侯之禮直龍樓而陪輦國士自許無雙領鳳沼以
燃藜驃騎常推第五叔祖太史公岐嶷性成英騫天縱金
鑊羊祜幼號象賢團扇王珉長稱難弟仲華拜交之歲雄
視上京蘭成射策之年高驅皇路三張接跡聯白鶴於雲
中二陸齊镳起朱霞於天半螭頭截葉呼爲秘書豹尾驂

驥目之行省徐孝穆之宮體流誦東朝王僧虔之書法播傳北闕紛綸之譽有類五經敏妙之稱奚殊三絕顧以風規簡令不樂貂蟬姿情清邵尤耽麋鹿雖牽絲於公府尤結想於山林無何而京師不守深恫皇輿江左偏安勉膺時命周伯仁過江名士時多流滯之談溫太真開府英流大有馳驅之志華林苑後屢警危微永福宮中時陳表餌然而大厦非一木之支崑岡有俱焚之懼黃旗氣黯庾信辭南青蓋悲來王褒入北時則關西後進隆之夫子之名遼左親王寵以不臣之遇然而顧榮失意祇羨蓴鱸沈炯多愁惟思鄉土遂拂衣而請退爰解職以歸耕卜宅金山結隣鐵甕宋文帝賦詩之所嘯傲忘年劉穆之射馬之堂優游用老居惟皂帽管幼安棹有高名坐滿白衣陶泉明

夙矜亮節蓋甲申變後久薄冠纓而丁卯橋頭尤工吟咏今正二日適届六旬時則東吳問字之人西蜀好奇之士竹林耆舊歌菊水以延齡蓮社賓朋畫桃源而獻壽彙爲一卷不啻百城公乃集開元天寶之詩寫故老遺臣之感鸞廻鵠顧沉雄澹鬱之章雁落猿驚慷慨嶒嶢之調譬之鷁名樓護固已出自五侯方於裘號田文亦已成由干腋崧也人惟落拓差有門風性極清狂不嫾世法王公膝下人每言此子之超謝傅庭前尊不以常兒相畜雖張克之臂鷹牽犬餘習未忘而王籍之飲酒彈棋勝情不減命書末簡以質羣公

椒峯弟詩經稿序

慨自平陵燕冷西京無丹轂之賓長樂鸞回東邸乏銀函
之彥臺城風月旣息意於箜篌河內臘脂久忘情於桃杏
張衡不樂馮衍長愁恨絳鶴之清陰訝銅蠡之岑闊於是
鳥衣少第重擅金樓白塵諸郎新裁玉樹過王根之宅攷
瑰之樹千重訪樊重之家玳瑁之簾萬軸春城腕腕能吹
秦史之簫夜館深沉醉啖石崇之棗曲騰三閣宜催張孔
之新粧才染六朝雅扇徐庾之別體優游妙咏婉變工閑
花下夾車不問金堂公主城頭挾彈誰交安息將軍復以
幼小明詩生平射策屈王濛謝眺之麗製作荀卿李克之
專家字字驚鴻行行夢鳥織扶風之錦半作鴛鴦翻江夏
之杯都爲鸚鵡若隨曹植之馬客譽其香如歸衛玠之車

人言其玉璫蟾齒鎖風心共意蓋爭舒銀虎牽絲露葉與
筆花競秀固已携之適洛應令高鷺陪軒袖以入關當使
吟蟬承鬢已僕也金花不落合住高樓油犧難歸偏知小
市抱倡蹊之花襍惟事湔裙拂野闈之明箱但思檠履幸
衰宗不墜阿連豈是常兒欣賢從有人諸江足自生活臨
文繪曲搘管叙心云爾

劉逸民學經草堂制藝序

吾友逸民劉子金刀妙裔銀管詞人鈞子政之雄奇胄源
東漢擅孝威之英麗家本南朝春日揮毫襞河北膠東之
紙秋風結客會鬼園鄴下之賓衣驚魏馬之香被擁鄂君
之繡加以酷好詞章曩篇特妙難忘遇合今體尤工葡萄
滿筐如看公主之花芍藥連篇似傍將軍之樹行間吐鳳
數來河間之錢車上乘羊傾盡潁川之市薛道衡人日之
作見此移心盧思道塞上之篇聞而障袂凡茲懿友悉有
序言乃於梨棗之餘謬辱糠秕之導嗟乎驚鸞舞鵠春明
河北之人別鶴離鴻草碧江南之客當我吳市吹簫之日
正子燕臺買駿之辰問善恨於文通僕真其選求定文於
敬禮世有其人庶幾交附青松敢曰序成元晏

儲雪持文集序

僕與雪持儲子謝范素交潘楊密戚洛濱之戲君旣獨步此間竹林之游僕亦雅預其末日者春寒正沴微霰載零其爲曲室之談聊作西窗之話用說生平以資諧謔語其枯菀殆有數端敘彼平陂殊非一致始者君方羈貫僕甫勝衣衛郎昔日潛游樂氏之門庭逸少當年徧謁鄰家之羣從君則楊修食果之歲已舉茂才黃琬對日之年便呼博士光延大宅正蓄歌鐘金谷名園方盈盛鬱屬有陽阿之妙伎能爲上蔡之新聲紫簫紅笛譜出龜茲涼酒銀燈舞成圓紇碧綾夜委偏留休沐之賓絳蠟晨燃不報當關之客雕軒匝地綺榭參天君時出則乘羊入而蠟鳳於胥樂也復何求哉繼而地坼蒼鵝人驅銅馬猥以綺羅之日

及乎離亂之辰此則君之一變也於是鐵籠宗人雲昏晝伏白衣公子菁密宵行修蛾曼睂憐綺袖之難歸金瑣瓊鋪痛高臺之易主綠腰歌罷再聽何年紅綬啞來相逢奚日君則幽憂不少怊悵絕多吹簫吳市佯狂見伍員之才搗鼓漁陽漫罵亦禰衡之氣屬百六之將終遂秦階之漸轉纔離兜虎便隸雕蟲乍脫鳥鳶羣修獻雉四國續盤敦之事三吳有盟會之言長裾短袂溢此門廬列駟華綏交於衢路此則君之又一變也無何而君之難弟長能廣期鍔淬芙蓉躍張華之兩劍價侔結綠獻韓起之雙環儀廙亢丁機雲耀陸或銀螭壓紐宰燕趙之名城或紫艾懸腰牧并汾之劇邑油幢絕麗綉繖何都而處姊歎未適人老驥悲猶伏櫪三旬滅竈五月披裘長顧領其何之行嘵臂

而自悼此則君之又一變也嗟夫傅鶴鱗之才調俛首何堪庾蘭成之詞賦傷心曷已負井公之博進壯不如人逋營室之聘錢憂維用老將欲排闈謁帝馭氣求仙而皇娥無將子之娛嫋女有詈予之懼是以錄成緗帙盡孫卿贗後之書皮以緯函悉虞相愁時之作爰以俟夫來者亦焉用此文爲僕也目覩高文已深愾慕心惟昔夢彌切傍徨乃於匠石之前不揣糠秕之導譬之涓人奏曲祇憐並鼓之簧紅女縷益倍惜同功之繭云爾

吳天篆賦稿序

四始以降代嬗歌謠六義而還家沿雅頌后夔堂下擅搏拊者三千孔子壇前操縵絃者十九列國大夫灑灑登高之作宗邦公子洋洋博物之稱楚疆善怨屈原則景差唐勒之師梁苑工文喬如亦枚乘鄒陽之亞無不權輿比興祖爾風騷班固以爲古詩之流楊雄亦曰詩人之賦不歌而頌曾聞玄晏之談體物爲長畧見士衡之論今夫茫茫大塊燥濕攸分渺渺圜區羿仁爰別繩編檮杌難詳九域之神姦蓍擗歸藏莫晰八紜之情狀禹州饒厲鼎不鑄而胡消晉渚多妖犀未燃而奚燭桃姬姣麗誰能自畫其容儀玉女幽閒猶冀代傳其響像興酣采烈卽京都亦聽其雕鏤骨俊才雄雖江海還歸其飲欲初咀華而纏態終離

器以存神元始而來亶其然矣況復翟泉鵝出興替何多
陳寶雞鳴盛衰迭見日輪恒是喧父以徒奔坤軸常搖
筭其工之慣觸媧簧乍弄已看渤海之枯堯鶴纔飛又見
咸陽之燼時則貞夫握瑾腹轉車輪誼士沐蘭口銜石闕
欲誠恨而不能縱舍辭其未可減文仲書藏譏謠頗多壹
鬱之思郭舍人語雜俳諧大有洸洋之志從來文士幾同
女子之善懷自昔悲歌大類溺人之必笑吾鄉門聖舊數
州來近日文豪尤推天篆爾乃詞源綺互筆陣葩流搜古
本之九丘識亡書之三篋蕭思話流連翰墨世曰無雙曹
不興遊戲丹青人稱第一更厭雕華尤耽玄簡宵參絳斗
晨誦黃庭九華爍煜餉黃玉於安妃三秀呵讌饋赤芝於
許斧青牛關上時遇老聃朱鳥窗中或逢方朔陶貞白隱

居之暇間涉篇章郭弘農遊仙之餘偏精詞賦文同東哲
學類仇香伯喈曠逸偶咏青衣商隱瑰奇曾吟錦瑟於是
借讀盈門求觀接踵人過市上競詢呂覽之編客到枕間
便索王充之秘鈔來小史祇言手腕之疲錄自毛公還爰
中書之禿則有譙國王孫謂曹子南耕爲謀剖劂荆南好事代
庄棗梨入錢恐後如酬字數之縑解橐爭先似釀博場之
箭頓令汲郡又出新書若在蕭齋定登上選洵可裝之玳
瑁真堪架以珊瑚更有一言竊爲三嘆昔者王褒論樂宮
人遍頌吹簫司馬言愁皇后下爲取酒吟成枯樹庾信旣
彰蓋綬於關中賦得玄猿徐幹亦珥豐貂於鄴下並緣麗
楊意以何年貧賤堪傷俟桓譚而奚日此則榮枯莫必季

主所以咨嗟顯晦難期唐舉於焉歎息者也倘千秋而逢
濟北定閔勞薪如四海而有中郎須憐爨竹

毛貞女墮樓詩序

貞女祥符令毛會侯女許字方渭仁子奕昭奕昭死貞女墮樓以殉

遇救獲甦詳西河大可序中

三辰霧塞爰徵不貳之心九曜烟霾方表靡他之節海波
湧洞乃有冤禽兩雪漂搖翻生恨竹臣出身而事主委贊
將誠女離家而適人靡笄見志紅顏赴義雄於一劍之師
縞袂趁風凜若萬夫之特然或盈門以後展也于歸見廟
而還全乎爲婦牛衣對泣已幾閱夫春秋鴻案相莊復淳
更夫寒暑甚者室中爛熳粗有諸雛膝下團園差多群稚
庾氏則苟娘在抱陶家則通子離懷畫眉窗裏身極分明
織錦梭邊情歸繫屬中人以上疇無硜爾之捺賢智之流
詎少矯然之志未有秦樓跨鳳卽逢綿惙之辰楚國委禽
便邁彌留之會困冉耕之療疾珊枕空陳患荀偃之癰疽

玉釵虛挂雙星尚隔能無鞅望之私百歲方賒終鮮綢繆
之雅恒情不免變彼何知而貞女則廁褕襪器手也摩挲
袒服中單躬焉接觸不辭淟忍寧羞衛婦之三言備歷艱
辛每爲杞梁而一慟聞而歎息見者嗟咨遂踐孤鸞俄成
寡鶴但使畢生髽髻亦足酬素志於賢雄假令沒世蒿簪
便足副所期於靈匹且夫飄飄乃奔月之人空空實下天
之狀璇臺十仞寧嫋控鶴之方綺閣千層詎曉驂鸞之術
而乃奮身以擲自投玉女之扉瞋目而呼甘觸媧皇之石
驚鴻大去翻同緣撞之嬉墮馬長辭幾類鞦韆之戲悲踰
裂胆酷擬屠腸此則宋王臺畔畧可儻其堅貞董相車前
適足形其芳潔斯時也筋骸癡癡絕意偷生口鼻嗚唆無
心乞活何意趙宮白璧偏經睨柱以還金矣圖秦國連環

縱值揮椎而不碎天哀志氣遂逢續命之膠人護孤芳早
給返冤之藥翩其尚在宛爾猶存於是刻彼苔華鐫之琬
琰詢貞姬之邑里居隣淛水曹娥問淑媛之門楣人是華
池毛女

閨秀商嗣音詩序

友人徐仲山夫人

從來福命大抵相妨自昔身名何常俱泰有我友之高才
際興朝之盛典嚴終接軛揮毫於鳩鵠觀前枚馬聯鑣授
簡於鳳凰闕下辭章溫麗至九重亦悉其名體製雕華卽
兩省盡傳其賦會遭逢之未偶遽行李之將歸西風落葉
別子三秋北渚微波送君千里爰於酒半自說生平并倚
風前爲言鄉里乃知高柔室內正有賢妻荀粲房中非無
令婦示我玉臺之咏玩其錦瑟之章蓋嗣音商夫人者卽
君之德配而前太傅商公之季女也爾其族望通華門楣
清綺扶風宅第惠班則才擅大家金卯家庭令嫻則名高
三妹冬缸夜煥援彩筆以吟椒春陌晨鮮展蠻箋而咏絮
固勝洛陽道上只解採桑非徒蜀郡爐頭惟能賣酒洎乎

降祚以暨同牢張子高畫眉之暇卽事觀書楊子幼鼓瑟之餘便思染翰加以姊如道蘊標名德於區中女是左芬扇風華於膝下一門才媛商雲衣獨矜秀善之稱兩姓賢甥祁湘君早得清新之譽堦前鄭婢並習風詩座上濟尼尤長辭令篇章間作燃脂而玳瑁干函倡和時聞拂素而琉璃萬軸傳粉薰香之什字字庾徐玉釵羅袖之中人人江鮑況復翟泉鵝出關河之悵愴何多陳寶雞鳴身世之感傷不少夜月歸寧則太傅之池臺安在秋風憶舊測尚書之棨戟都非涉綠野之空園入烏衣之短巷殘山賸水頓成今曩之觀伯姊諸姑畧說興亡之事借班管以描愁託銀箏而訴恨此則韓娥蕩魄聲因激楚而彌工衛女消冤詩以悲哀而入妙也因語故人君真奇福假令淇泉無

巧箋之人魯國有宿瘤之女孝標牒仕偏逢轍轉之妻馮衍封侯長守噭眺之婦中懷已盡人世奚堪此則對風月以增歛抑且邁綺羅而成瘞卽使室非交謫家有同心然或妾住河陽君官淄右盛年紅粉響砧杵於天邊異國青衫聽琵琶於亭下悲哉南國之佳人逖矣東方之夫婿年年計吏頻緘徐淑之書歲歲空閨長寄竇滔之字難同弄玉雙吹鳳竹以成仙翻羨王章其卧牛衣而灑泣在彼何辜在君何幸行矣長征何必預人家國歸歟此日猶能樂爾妻孥種山實英雄兒女之鄉耶溪尤粉黛烟霞之窟左携嬌女姑消憤懣於詩歌右擁孺人且澣牢愁於文史遠峰冒際何須看馬上之西山聞苑人間底事戀雲中之北闕還鄉甚樂去國何傷君曰有諸斯言良是藉卿弁語縱

倚馬以奚辭貽我細君遂揚鞭而竟去

葉井叔悼亡詩序

寒風寥泵楊雄但解客嘲晏歲增嶸孫楚新除婦服祥琴
乍鼓暗驚四節之如馳莊金載賡倍覺寸心之若結方圖
寬譬姑酌金罍正擬消搖聊彈玉局何意楚狂猥遺越調
春蠶死後重牽繚繞之絲蠟燭燒餘再灑淚之淚疇云
痛定祇益悲來蓋自俗異狂猿人非太上空林有鳥尚傳
並命之禽絕壑多枝猶說同生之木何況弱齡并曰淳歷
流離早日蘢鹽曾經逆賤黔婁之樞內荼苦居多冀缺之
釣白月鮮長圓之夜樛柯何物空悲女手之拳然筐筥奚
情猶記桑條之沃若緬虛無之遺挂愁髮鬚於餘熏此則
何須海上伯牙亦遂以移情不待雍門孟嘗亦於焉承曉

也嗟乎樊湖烟水故國依然少室雲山舊游如昨望楚天
之似黛轉憶膏鬟盼湘水以如羅還憐巾帶假非鰥侶誰
知此曲之悲況屬恨人詎識有生之樂晉荀粲撫斯編而
惆悵怒矣傷神魏吳起聆是集以軒渠衷如克耳

琴怨詩序

琴怨詩者吳陵黃子天濤悼其已姬陸小雲之作也

若乃香薰江夏黃郎雅號多才粉琢清河陸女尤工巧筴
妾家射瀆相隣漂母祠邊郎住吳陵不違玉人橋下一自
參媒氏灼遠移稱意之花遂令鳳舞鸞歌競唱定情之曲
迎來桃葉空北部之臘脂嫁得文鷺壓南朝之金粉奚勞
隔巷更看新人詎必提筐還逢故婦固已極綺羅之勝事
寧徒艷花月之新聞然而菱鑑難圓桂輪易仄樓中羸女
只想吹簫殿上羿妻偏思竊藥花何年而不落鳥何事而
恒啼甚至南陽菊水不見延齡西域名香焉能續命蟲有
可憐之號草多獨活之名以致黃泉白月佳人留鍛臂之
盟碧海青天方士乏返魂之術唾殷紺袂猶期鼓瑟於他
生淚滴鮫盤還訂畫眉於再世天乎已酷人也奚辜傷如

之何吁其甚矣時則窗下簸錢時聞剩響鏡中組額恍見
殘痕生憎翠竹難掃愁蛾不分緋桃偏描笑靨綠珠一去
彌增衛尉之悲碧玉無歸長抱汝南之恨況秋風夜雨之
經心更斷墨零紛之觸眼韭花一寸依稀幄裏之香柳絮
數行散漫奩間之粉此則達人齊物太上忘情魯酒可以
合歡靈犀於焉蠲忿終無以弭彼幽憂療其疾疢者矣嗟
乎井公縱博本非行樂之方玉女投壺孰是爲歡之具芒
芒蒼昊索笑何年浩浩黃輿埋愁無地凍合銀河將天上
之消䰟更甚賣來金盃彼夜臺之含怨何多蓋自天荒地
老而來暨夫歷劫窮塵以後傾城傾國代有其人爲恨爲
悲古多斯事僕也生亦情長老而才盡酒闌燭跋偶披傷
逝之吟月落河斜閒展悼亡之作屬綴蕪詞用并綺語自

楊齋畔千秋長恨之歌黃葉村前三尺小巒之墓

茹蕙集序

吾宗無垢者曹則大家左爲嬌女描鸞刺鳳空北部之臙脂綉虎雕蟲壓南朝之粉黛十三織素宛爾無雙二八稱詩居然第一駁娑館內寧誇巧筭之名道政坊前不尚新粧之號若夫品地清華門風綺麗紅牙作筆則劉氏之三娘白玉爲堂乃盧家之少婦霍驃騎卯金鉅族張尚書典午名流天邊列宅處處銅街春日乘車人人玉埒屈大夫之騷賦常說姊嫋衛莊姜之比興時稱戴媯於是弱卽知書生而習禮東隣美女爭傳咏絮之篇西邸佳人競倣簪花之格琉璃硯匣旣繡閣之庾徐璵瑣筆床亦香閨之潘陸加以性情道素靡事鉛華儀度幽貞壹遵禮法青牛帳捲絕無累德之篇朱鳥窗開時錄緣情之作當春而感楊

桺之綿入秋而怨芙蓉之粉冬缸鑿魏映雪彌勤夏簟氤
氳囊螢不輒凡彼燃脂如是而已其他弄墨畧無聞焉然
而命實不猶人兮鮮淑靡蕪道左愧手爪之難如磐石塘
前識錢刀之可用青年織錦悲竇氏之機殘玄夜薰香帳
秦嘉之鏡遠鑿隣火以腸迴攬嫁衣而淚落則又衛洗馬
所以言愁江醴陵於焉賦恨者矣嗟乎羲和沉湎剪鵠首
以何辭玉女飄姚懷媯媒而終老離家公子命已儼夫纖
腰失路才人恨終齊於齷齒古人之怨千年地下之愁萬
里沉之碧海纍纍鮫妾之珠鏽以青天歷歷媯皇之石





圖

